

С (Колми)
33383

МИХАИЛ ИГНАТОВ



ВАСЬÖ
ДА
КАРДИНАЛ



THE UNIVERSITY OF CHICAGO

PHYSICS DEPARTMENT


PHYSICS DEPARTMENT
5712 S. UNIVERSITY AVE.
CHICAGO, ILL. 60637
TEL: 773-707-3636
WWW.PHYSICS.UCHICAGO.EDU

МИХАИЛ ИГНАТОВ




ВАСЬÖ
ДА
КАРДИНАЛ

Висьтгяс



Сыктывкар
Коми книжнöй издательство

1982



СОДЕРЖАНИЕ

КОР ЭМОСЬ ДРУГЪЯС

3

ВАСЬО ДА КАРДИНАЛ

11

АСЛЫСЬЯМА МОРТ

17

ВИЛЬЫШ ОСЬТУК

29

КОЛЪОЗЛА

37

КИРПИЧ ВОЧЫСЬЯС

46



КОР ЭМӨСЬ ДРУГЬЯС

Васьёлөн бать-мамыс мунисны удж вылө: мамыс — силос гу дорö, а батыс электростанцияс. Васьö эськө вöйысьлис жö батыслы, корис, мед босьтас аскöдыс, но батыс шуис, мый талун оз позь, мöдысьджык пö ветлам. «Мöдысьджык»... Виччысь ныр нюжавтöдзыд! Бара вунöдас. А кутшöм, кöнкö, лöсьыд сэни!..

И Васьö мукöд луньясö моз жö коли гортас, пöльыскöд. Но талун пöльыс эз сёрнит: тыдалö, мыйыськö дöзмöма.

Васьöлы лои гажтöм. Сийö петис ывлаö да пуксис кильчö пос тшупöд вылө. Мыйла талун пöльыс кутшöмкö аслыскодь? Мукöд дырйи кортöг ачыс заводитас висьтавлыны мыйкö йылысь и висьталас сэтшöм уна да интереснöя. Васьö эськө дугдывтöг кывзис. А талун дузъялö-ветлöдлö...

Тöрыт Толей шуис, муна пö Пожöг сиктö. Вөлöмкö, Толейлөн эм пöч, и сийö олö сэни, Пожöг сиктас. И мыйла сийö сэни, мöд сиктас олö, оз öмöй позь тани? Олö жö со сылөн, Васьёлөн, пöльыс, и оз норась. Гашкö, коркö сöмын сы вылө, Васьö вылө,

ёна дурёмысь дözмыштлас... Эк, Толей мунас, и Васё кольö другтөг... Вот эськö вок кö вöли сылөн, сэк эськö! Чойыд Васёлы оз ков. Толейлөн со чойыд эм, Рая. Ок, и асныра жö, вреднöй. Сійö Толейлысь и Васёблысь öтнас эсійö... нервьяссö тшыклöдлö. Вöчас мыйкö лёк ног, кывсö мыччыштлас дай пышъяс — и ворсны нин окота оз ло сы бöрын, дышöдö ворснысö... Со тöрыт на Толейкöд вöчисны пöвйысь паракод, кöсйисны ва дорö лэччöдлыны, видлыны, кызди ва вылас кутас öшйыны. Эштöм бöрас пуктисны сарай пос улö. А парусьяссö картонысь вундалиг-вöчалигкості паракодсьыс толькö пöвторйис кольöма. И Рая бара кывсö мыччалö. Таысь Толейкöд лöсьöдчисны велöдыштны сійöс, кутисны кöсаöдыс. Но сійö бöрддзис — жаль лои. А кор юрсиöдыд кутасны, öд и збыль доймö. Васёöс мамыс корсюрö босьтлö жö юрсиöдыс — ок, кутшöма доймö. Лэдзисны Раяöс, эз кутны мучитны: сійö öд ещö на дзоля, на дорысь кык арöсөн дзоля. А паракодсö шуисны выльысь вöчны, но, буракö, вöчтöм лöö: Толей со мунö.

Васёлы лои жар. Шондйис сötис, и Васё думыштіс мунны сарай пос дорö. Сэні пос бокас уна лыаыс: и гöрдов, и руд, и еджгов. А лыа вылас чагторъяс. Тайö — машинаяс. Сідзи чагторьяссö найö нимтисны Толейкöд. Лавкаысь ньöбöм машина-чачаясысь лыа вылын туйыс артмывліс мисьтöм, а чагъясысь — мича, разнöй. Уна визьяс, весиг узоръяс позис вöчавны, кутшöмъяс тай стенин карточка рама вылын овлöны.

Васё босьтіс чагтор, нуöдыштіс лыа вывті да лэптис юрсö, видзöдліс гöгöрбок. И друг аддзис Толейöс. Сідзкö, абу мунöма? Потшöс саяс сулалö. И мыйла сэні сулалö? Гашкö, мунö нин да прöчайтчыны локтис? Гырысыяс öд прöчайтчывлöны, мыйла, сідзкö, оз позь и поснияслы? Васё вывті рад лои.

— Лок. Лок татчö! — нюмдіс вом тырнас да содтис ещö: — Öдйöджык!

Сöмын Толей удитис вуджны потшöссö, Васё юалис:

— Эн мун?

— Мамö шуис: аски.

Аски. Батысь Васёлөн асывнас висьталіс, мый аски вöскресенньö, шойччан лун. Кöсйисыс весиг сійöс чери кыйны босьтлыны. Чери кыйны век лöсьыд, кажитчö Васёлы. Сöмын номъяс курччасьöны, а оз кö эськö — вывті бур. Но сэн

од век он ло. Чери кыйом чери кыйомон, и век жо лёк, мый Толей муню... кыз нө сийо кутас овны сэни, йоз сиктас, тодтомъ-ясыскөд гожомбыдсө? Думыштасны жө мыйкө гырысьясид!

— Ворсыштам?— Васью нюжөдис Толейлы чагыяссө, кодьясысь лыа вылын артмалисны медмича серьяс.— А мун-нысө нө быть колө?

Толей ышловзис да шуис:

— Пөчө корө. Сийо пөрысь нин, частө висьө.

— Тэ радейтан сийос?

— Сийо бур, жаль меным... А мамө шуө: кулас пө сийо ре-гид,— Толей муртса веськөдчыштлис.— Арнас... школаө ме бөр локта.

Васью докнитис юрнас, ёнджыка топөдис вом дорьяссө, чужомыс стрөгмыштис, гажтоммыштис. Толейлөн кө пөчыс висьө, мунны, дерт, колө. Вот Васюлөн кө пөлыс олис ылын и висьмис, сийо эськө тожө мунис. Пөль-пөчнад лөсьыд, сэтшөм унатор найо төдөны. Васюлы, наверно, некор сы мындасө не төдны, мыйта пөлыс төдө, көть арнас и школаө пырас. А пө-лыс ещө шуө, сөмын кык класс пө и помавлөма.

Но бурджык эськө вөли, пөчьясыд да пөлясыд кө эз вись-лыны.

И друг торкис сылысь мөвпьяссө виччысьтөмтор: пес чи-пас сайысь кодкө зырөдис на вылө. Ставыс тыри бусөн; оз позь синьяс восьтыны, пиньясын чазөдчыны мөдис лыа. Васю первойсө нинөм эз гөгөрво, пуксис и несйис неумынысь дор-выв. И сөмын сэки адзис неылын сулалысь Раяөс.

— Вась-пась, Вась-пась,— нимтысис кок пөв йылас чеч-чалысь Рая.

Ак, тайо сийо! Бара тшыкөдис ставсө, мый сэтшөма зильө-мөн вөли вөчөма лыа вылын! Позьө өмөй терпитны? Сийо зы-рөдис Рая вылө. Мед толькө шедө!.. Рая эз жө узь, эз кут вич-чысьны. Но пышйигас сийо вильсмуни, уси и бөрддзис. А Васю босьтис сийос көсаөдыс. Всө равно босьтис, көсийс став пустуй-төмсьыс вештысьны.

— Эн, колөкө, варт чойөс!— Толей сулалис зумыш, бу-кыштчөма.

— Тэ нө мый, дорьян?— Васю шензыштитис неуна, весиг-кисыс лэдзис Раялысь көсасө.— Сийо... сийо жө... ставсө век миянлысь жуглө. Төрыт паракөд, талун...

— Мунам, Рая! Ещö ворсны корö!— Толей букушöн видзöдлис Васьö вылö, шыбитис кисьыс чагьяссö.— Тэ, смотри, вачкавны кö кутан чойöс! А то....

— Мый «а то»?— водзлань воськовтис Васьö, но Толей да Рая вуджисны нин потшöс вомöн, ылысмисны керкаланьныс.

Мунö кö и мед! Васьö бергöдчис мöдарö. Аслыссяма кутшöмкö талун Толейыс. Тöрыт ачыс шуис, медым Раяöс велöдыштны, а талун «а то»! Мед мунас, Васьö и öтнас ворснытö вермас.

Но öтнаслы ворсны дышöдис. Сэтшöм лöсьыд вöли — и вайöдис жö кодкö эсийö Раясö!..

Сэк жö неылын сысянь мыйкö, кылö, шнөпкысис муас. Видзöдлис — из. Мый нö тайö? А-а, вот мый? Рая из чукöртö, а Толей лыйлö. Другөн ещö шусьö. Гусьöникөн, бöрладорсяньыс, изьясөн... Но Васьö абу жö полысь рöдысь. Толейлы Рая чукöртö изьяссö, а сылы — некод. Но сийö и ачыс чукöртас. Найö изьясөн жö позьö...

Копыртчис изла — турун пиын мыйкö югнитис. Ньюжöдис кисö — вöлöмкö, консерв банка вевт. Кусыньтöм дорьяса. Лöсьыд...

И лэбзис вевтыд. Кокныыда, вылö качигтыр, а сэсса чукыльтис. Кытчö? Васьö эз нин аддзы, кытчö. Сийö суныштитис картупель кор пиö и, му бердас жмитчигмоз нин, кылис стеклö жугалöм шы. Да сэтшöм гораа, мый пельяса юркнитис.

Васьö öдийö пондис киссьыны бöрöздати. Кыдз-мый позьö öдийöджык, ылöджык, мед эськö эз аддзыны. Сийö дзик вунöдлис, мый Толей да Рая ставсö аддзылисны, тöдöны и вермасны висьтавны. Васьö думыштитис та йылысь да дугдис киссьöмысь. Котöртисны нин, кöнкö, Васьö пöль дорö да соритчöны. Мед! Нарошнö öмöй сийö öшиняс лыйис? Асьныс жö первой заводитисны. Сöмын батыслы норасясны. Оз босьт та бöрти ни чери кыйны, ни электростанцияс. Ставыс воши.

Васьöлөн дзугыльтчис сьöлöмыс. Сийö весиг кымыныськö кыкыштитис нырнас и тöдлытöгыс вугыртис шондйөн шонтöм бöрöздаын. Но узис недыр, садьмис, кодкö гильöдис голясö да. Чышкыштитис кинас, а тайö, вöлöмкö, кыша гаг. Кыша гаг усимуö, куйлыштитис вöрöшитчытöг, а сэсса кайис вывлань картупель за кузя да петис кор вылö. Сувтис, бара виччысьыштитис, паськөдис бордьяссö и лэбис. Мыйла бара оз позь недыр кеж-

лө пöртсьывлыны татшöм кыша гагйö? Кöть лун-мöд кежлö? А бöрыннас эськö локтис да сэтшöмторъяс висьталис — дертнин, эз кутны нöйтны. Но оз позь. Васьö тöдис: сэтшöмьд сöмын мойдын овлö. Эк, мыйла бара öни волшебникъясыс оз овны!..

Сйö лэптис юрсö и аддзис пöльсö. Пöльыс кильчö дорас вердис понписö. Сувтны öни öпаснö! И Васьö кыссис бөрöзда помöдзыс, тювкнитис-петис потшöс костöд, котöртис матысса керка пельöс сайöдз. А водзö... водзö позьö мунны восьлөн, сайласьтöг, тэрмасьтöг — оз тыдав. Но — кытчö? Ю дорö кöнин-а: челядь, кöнкö, сэнöсь.

Юыс вöли векныдик да ляпкыдик. Паськыд да джуджыд сйö лолö сöмын тулыснас да арланьыс, августсянь, кор тупкывлисны электростанциялысь плöтинасö. Сэки юсыс артмывлис ты, и сэнi кытыськö кыптывлис нюйт, турунвиж, нильöг, зывöктана. Пöльыс висьтавлис, мый тайö пö васаыслөн позьясыс... А öни, батыс висьтавлис, электростанциясö ремонтруйтисны; августыд вöли ылын на, и позис повтöг купайтчыны. Сйö юыс, кытчö найö ветлывлисны батыскöд чери кыйны, вöли таысь ыджыдджык, визувтис сиктсянь верст-мöд сайтi бокытi.

Челядь купайтчисны. Васьö котöртигмозыс пöрччысис, паськөм чукөрö шыбитис дөрөмсö да гачсö и тожö уськөдчис валань. Но ваö пыртöдз кöдзöдис сойяссö да морөссö: Толей век тадзи жö вöчö, шуö, оз пö позь пырысь-пыр ваас чеччыштны — вирыд вермас сувтны. Толей кö шуö, сiдзкö, збыль...

Васьö уськөдчис челядь чукөрö. Ваас вöли сэтшöм лөсьыд, сэтшöм гажа резны öта-мöдöс, сэтшöм лөсьыд туплясьны шоныд лыа пиын, мый Васьö вунöдис ставсö.

Пöтмөн купайтчөм бöрын — а Васьö лыдсö вайöдис дас öтиöдз — челядь думыштисны вугравны йөршьясöс. Котöртисны гортаныс вугыр шатьяла. Котöртис и сйö. Горт дорöдзыснин пöшти котöртис и... друг дум вылас уси. Лои бөр косны.

Рытланьыс челядь разöдчисны гортаныс. Мунис и сйö, жугылиник, гажтöм. Вот сйö пырас, а батыс виччысьöнин тасмаөн и кыз тай швучöбтас!.. А гашкö, батыс оз на тöд? Гашкö, некод на сылы эз висьтав?.. Сйö бөр гажмыштис, весиг заводитис шутьлявны...

Васьö котөрөн кайис кильчö вылö, восьтис керкаö пы-

ран өдзөссө, көсйис мыйкө гажая горөдны, но... быттьө кынмис порог вылас.

Пызан вылын куйлис жугалөм стеклөа өшинь рама. А батыс гөгралис пызан гөгөр, лөсьөдчис, кодарсянь матыстчыны рама дорө.

Васьөлөн быдлати көдзалис. Öни заводитчас. Сийө весиг дасьтысис бөрддзыны: кор бөрдан, омөльджыка доймө и регыдджык дугдөны нөйтөмысь. Тайөс сийө төдмалис важөн нин.

Но батыс сийөс эз казяв, ноксис пызан дорын. Сэки Васьө воськовтис водзө, сэсяя нөшта, нөшта и гусьөникөн кайис пөлатьө. Пөлать пөвьяс дзуртыштисны, но батыс бара эз кыв тайөс. И Васьө кокныдджыка лолыштис. Öни кежлө, кажитчө, прөйдитис. А ужнайтөгөн мый лөө?

Сийө кылис, кызди батыс алмазөн вундалис стеклө, пуктис рамаө да шуис: «Гө-тов!» Сэсяя петис, тыдалө, нуис өшиньсө Толейясө. Бөр локтигкежлас мамыс лөсьөдис нин ужин. Пөлатысь корисны тшөтш Васьөөс. Эз көсйи лэччыны, но медым ещө өнджыка оз дөзмыны, быть ковмис лэччыны. Да и кынөмыс өна сюмалис.

Ужнайтөгөн батыс бара нинөм эз шу. Сийө вөли кутшөмкө мөд пөлөс, эз пырся кодь, гажая: висьтавлис мыйкө мамлы и пөльлы. Васьө эз кывзысь. Но мыйла батыс оз видчы? Öд төдө: өшиньсө жугөдис сийө. Толькө шуис, медым сөйис крепыдджыка: водз пө чуксала. Сидзкө, и чери кыйны босьтө. Мыйла нө тадзи? А гашкө, эз висьтавны батысслы, коди өшиньсө жугөдис да?

Да, батыс талун вөли дзык мөд кодь.

А асывнас Васьө дыр эз вермы гөгөрвоны, мый сысянь корөны. Син лысьясыс некыз эз көсйины торьявны, быттьө войнас кодкө клейөн мавтыштөма. Сэсяя кытысянькө ылысянь локтисны-локтисны да сувтисны кывьяс: «Чери кыйны!» Кажитчө, батыслөн гөлөсыс шуис. А гашкө, Васьөлы и аслыс дум вылас воис. Но сидз ли, тадз ли — сийө садьмис.

...Ывлаын гөгөр лөнь: сөрнит да гусьөник, медым некодөс не садьмөдны. Асыввылын гөрд кыя сайө дзевсьөма шонди. Дзоридзясясянь да турунвивса лысвасянь өвтис небыдик ыркыдөн. Васьө восьлалис батыс бөрся векныдик трөпаөд. Бать воськовьясысь коли туй — көтасьөм туруныс лямали.

Васьо зілис восьлавны батыс кок туйясо. Недыр мысти батыс шыасис:

— Лысваа. Сідзкө, луннас оз зэр.

Сійо гөлөсысь Васьо кыліс стрөглун. Скөралө, но висьтавны оз висьтав. Мамаыс, көнкө, корис, медым эз нөйт сійөс. А тани өд мамаыс абу, друг батыс чегас нөр да лэдзас сылысь гачсө...

А батыс муніс водзө, эз и думайт нөйтны. Эз сёрнит, сөмын кыкысь кымын очсыштіс, ыджыд, кузь гөленя сапөга и пельпом вылас кык лопта пелыса. Васьо пөшти котөртіс сы бөрся. Сійо эз жө сёрнит. Эз кө вөв эськө эсію өшиньыс, сійо сёрниттөг эз мун: сёрниттөгыд гажтөм, и туйыслөн помыс абу. А заводитлы сёрнитны — кызд ещө артмас? Бурджык лө, оз кө шыась.

Найө воисны ю дорө. Батыс заводитіс разьны пыж чепсө сюръя бердысь. Васьо сулаліс орччөн. Сулаліс да видзөдіс батыс вылө, сылөн паськыд мышку вылө, кияс вылас. Кушөм сылөн киясыс ыджыдөсь, ёнөсь. Оз прөста электростанцияын уджав. Öдйөджык эськө быдмыны, сэк эськө сійо батыскөд муніс жө электростанцияас, уджавны эськө муніс. И батыс сэки босьтіс эськө, эз нин шу: «Мөдысьджык». Васьо видзөдіс-видзөдіс, и друг сылөн петіс вомсыс:

— Батьө...

— Мый?— шыөдчис батыс, чепөн ноксигтыр.

Бөрынтычыны вөлі некытчө нин, и Васьо висьтасис:

— Тайө ме... өшиньсө жугөді... Төдлытөг.

Васьөлөн юрыс лэччис морөс вылас, а синьяссыс тюркнитісны синва войтыяс, веськалісны вом дорьясас, солаөсь.

Батыс сувтіс, бергөдчис сыланьө.

— Төда ме. Төрыт на Толей да Рая и висьталісны, дорйисны тэнө. Но-о, вай тырмас, тэ жө мужик, Василей Егорович.

— Толей да Рая?!— шензис Васьо.

— Найө тэнад — вот! — крепыда шамыртліс кулаксө батыс.— Бурджык другьяс оз и овлыны. Толькө тэ мөдысь эн нин вөчав татшөм «төдлытөгьястө». Төдан, ме абу зэв мастер стеклөястө вежлавны.

Васьо видзөдліс батыс вылө — батыс, кажитчө, нюмдыштіс.

— Ладнө,— джын гөлөсөн, но чорыда шуис Васьö.

Бöрынджык сийö пукалис пыж нырын да кутис кыснан көв. Пыж бокын сяльгис, варовитис ва.

— Батьö... а тэ босьтлан менö электростанцияад?


— Ме жö көсйыси. Ёна кө окота: аски и ветлам.

Васьö вочаасис синъяснас батыслөн синъяскөд, да сылы лои долыд и яндзим. Батыс, вөлөмкө, весиг абу скөр, а нюмъялысь, гажа, гөгөрвоысь. Медся бур... Жаль сөмын — Толей абу тани... И Рая. Рая волөма тшөтш, дорйөма, батыс шуö. Сидзкө, абу жö нин сэтшөм вредной. Васьö жö пыр Толейкөд ворсö, а Рая öтнас. А öтнадлы... Васьö төдö, кутшөм гажтөм öтнадлы овлө, кор ворснытö некодкөд! Рая гажтөмысла и мешайтчö, вөлөм. Локтасны чери кыяниысь, и став ворсанторсö сетас Раялы, мед ворсö. Аслыс öд регыд нин оз кутны ковны: арнас школаö пырас. Найö Толейкөд... Эк, Толей муно талун! Но нинөм, кор Толей оз ло тани, сийö, Васьö, Толей пыдди Раякөд лоас. Гашкө, кодкө сийöс Толейтөг öбижайтны кутас... Но мед только видласны!

Шондi югöрыс вундiс юсö кузяланогыс и небыдика востiс синъяссö лыа дорын быдмысь бадь пуяслысь. Ю весттiгыс мөдiс кывтны öдва тöдчана ру. Васьö бергөдчис шондiлань да кунис синъяссö. У, кутшөм югыд вөлөма! Со и лэбачьяс тивксыны мөдiсны видз вылас! Лөсьыд жö нин, мый батыс босьтiс сийöс татчö, чери кыянино. И номъяс весиг абуöсь. Васьö думыштчис. Зэв бур, мый сылөн эмöсь татшөм другьяс, Толей да Рая. Көнкө, öнi узьöны на. Коркө мөдысь позяс найöс нуöдлыны тшөтш.

Заводитчис лун. Виль, гажа, шуда лун. А аски лоас ещö на гажаджык: аски найö батыскөд мунасны электростанцияö. Позьö и Раяöс босьтны, öтнасөн гортын олөм дорысь гажаджык сылы лөö. Дерт, батыс кө сөгласитчас. А батыс... батыс, дерт жö, босьтас: сийö öд гөгөрвоысь морт.





ВАСЬӦ ДА КАРДИНАЛ

Васьӧ куйліс потшӧс бокын турун пӧвстын да видзӧдіс, кызди медулі потш вывтыс, мышсӧ гӧрбылялігтыр, кыссис гӧрдов да кольквиж чутъясӧсь сьӧд гӧна номыр. Васьӧлы окота лои сувтӧдны сійӧс да пондыліс пановтны турун заӧн, но весьшӧрӧ: номырлы, тыдалӧ, зэв колӧ вӧлі воӧдчыны кытчӧкӧ аслыс коланаинӧ да турун водзын сувтыштлӧм бӧрын вуджліс вомӧныс.

— Васьӧ-ӧ! Ва-асюк! Лок ӧбедайтны!— горалис кильчӧ вивсянь мамыс, но Васьӧ эз чеччы. Сылы окота вӧлі, медым мамыс нӧшта на горзыштіс. Но мамыс эз кут сӧсся горзыны, пырис гортас. А Васьӧ ылалис номырнад, да пырсӧ эз на ло мунӧмыс, а кор сӧсся дышӧдіс сійӧс дӧльӧдны, кӧсйыліс нин чеччыны да котӧртны, но друг кыліс енӧжысь лӧбачлысь чиркнитӧм:

— Сррчч-сррчч!

Сійӧ бергӧдчис мыш вылас да аддзис сырчикӧс. Сырчик бергалис енӧжын: то усыштлас ичӧтика, то бара лӧбзьевлас вылӧджык. Сӧсся бордьясӧ топйӧдлӧмӧн тывгысялігтыр лӧччис увлань да пуксис потшӧс вылӧ Васьӧсянь неылӧ.

«Бобувъясѡс куталѡ. Сетны эськѡ сылы этайо номырсѡ, да ѡд татшѡм гѡнатѡ ѡдвакѡ сѡяс?»— Васьѡ видзѡдѡс сырчик вылѡ, некытѡ вѡрзѡдтѡг, весиг синъяссѡ эз лапйѡдлы, мед не повзѡдны лѡбачѡс. А сырчик видзѡдѡс Васьѡлы вѡча то ѡти синнас, то, бергѡдас юрсѡ да, мѡднас — и быттьѡ шензис: кытысь пѡ и мыйла тайѡ детинкаыс друг лѡи тани?

Лѡбач мыйкѡ кутѡс вѡмас. Сийѡ недыр дзѡръялис на Васьѡ вылѡ, сѡсся заводитѡс котшкѡдны нырнас потшкѡ, посньѡдѡс сѡянсѡ, а сѡйѡм бѡрас бара гажѡа чиркнитѡс:

— Сррчч, сррчч! — и пырысь-пыр жѡ повзѡмѡн лѡбзис.

И вѡлѡма мыйысь повзынысѡ: Васьѡ аддзис, кыдзи потшѡс мѡдар боктыс сѡтчѡнсьѡн, кѡнѡ сѡмын на пукалис сырчик, локтѡс Қардинал. Тайѡ вѡлѡ гѡрдов кузь гѡна пѡрысь кань, кодлѡн голя гѡгѡрыс, быттьѡ еджыд кѡртѡд, тыдалѡс визь. Сиктын ашѡр челядь пиысь некод эз тѡд, кодѡ и мыйла каньсѡ шуѡма татшѡм тешкодъ нимнас, сѡмын тѡдѡсны, мый сийѡс кольлис во-мѡд сайын сикт пыр мунысь геологическѡй экспедиция и мый сѡтчѡдз понъяслѡн эз на вѡвлы сѡтшѡм скѡр врагыс, кодысь ковмывлѡс пышйыны весиг медся збѡйясыслы. Васьѡ юавлис бѡтыслысь, мыйла каньсѡ сѡдзи нимтѡмаѡсь, и бѡтыс висьталѡс, кодкѡ пѡ дуригмоз тѡдзсѡ шуѡма гѡрд гѡныс понда. Ылѡ странаясын пѡ тѡдз кутшѡмсюрѡ попъясѡс шуѡны, и найѡ пѡ новлѡны гѡрд рѡма кѡлуй.

И Қардинал овмѡдчис Васьѡ сусѡдъясѡ, Толей да Рѡя ѡрдѡ. Гашкѡ, сы вѡсна, мый налѡн эз видзны понъясѡс да сийѡн. Овмѡдчис и быттьѡ век сѡнѡ и овлѡма. Кор Васьѡ воывлѡс Толейясѡ, а воывлѡс вель тшѡкыда, пыр ворслис-ноксьывлис каньѡн. Но Қардинал эз радейтлыв ворсны. Сийѡ пыр куйлис, быттьѡ век вѡлѡ узьтѡм, и нюжѡдчѡмѡн слабника мургывлис. Сѡмын корсюрѡ вѡрѡшитчысь бѡж сертиыс позьѡ вѡлѡ тѡдны, мый сийѡ ѡз узь, а прѡстѡ синъяссѡ куньѡма. Қиѡн шыльѡдѡмысь сылѡн гѡныс трачкѡдчывлѡс, и сийѡ сѡк вѡрѡшитыштлис пельяссѡ, дугдывлѡс мургѡмсьыс, кывзысьлис. Қардинал эз вѡв мукѡд каньяс кодъ, сийѡ некѡр прѡстѡ эз нявзывлы. А кор Васьѡ гѡститѡдлис ѡбедысь кольѡм яйторйѡн, сийѡ эз уськѡдчыв яй вылѡ, а первой зыртчис Васьѡ кокѡ — аттьѡалис ас думсьыс и сѡмын та бѡрын сѡйлѡс. Васьѡ зѡв радейтѡс Қардиналѡс и пыр кутлис пѡдзѡс вылас да небыдика шыльѡдлис.

Ѳнѡ жѡ Қардинал вѡлѡ мѡд, тѡдтѡм. Сийѡ вѡсьлѡлис надзѡ-

никон, чошкөдчөмон, кынмылом пельяссө кадысь кадө вөрө-
шитиг да турунсө, мусө и потшсө исалиг. Сийө то сувтовкерлис,
то воськовтлис водзө, и оз вөлі кыв ни сылөн кок шыыс, ни ту-
рунлөн шарскөмыс. Синъясыс өні вөліны восьсаось и скөрөсь.
Тыдалө вөлі, мый сийө кодкө вылө скөраліс. Васьө первойыс
на аддзис сийөс татшөмон. Сийө чуймөмон, вөрөшитчытөг, ви-
дзөдіс кань бөрся. Кардинал эз аддзы сийөс. Медбөрти Васьө
думыштіс чукөстны Кардиналөс:

— Кардина-ал! Ксс, лок, ксс!

Кардинал быттө кынмис места вылас, өти водз лапасө
лэптөмон, да, тыдалө, думайтіс, мунны водзө али косны, кор
сийөс казялісны нин. Сийө сувтөдіс көпейка кодь виж синъяссө
Васьө вылө, но өні явнө эз төд Васьөос.

— Кардинал! Ксс!— выльысь корис Васьө, но кань сөмын
вөрзөдыштіс өти тшөтшалөм пельнас, сэсся мыйлакө бара
дукалыштіс турунсө дінсьыс, надзөникон, скөраліг, вөрөши-
тыштіс усьяснас, сы бөрын пыркнитіс лапасө, быттө лапаыс
мыйөкө нйитчис, бергөдчис да тэрмасьтөг жө, кызди и локтө
вөлі, мөдөдчис бөр, бөжнас өтарө-мөдарө өвтчитыр. Буракө,
тадзи петкөдліс кодкө вылө скөрлунсө.

Кардинал муніс, да Васьө көсийс жө нин мунны гортас,
мамыс тырмымон нин виччысис сийөс, но друг бара аддзис сыр-
чикөс. Сийө лэбзис кысянькө да первой пуксис пөгреб вылө,
лайкөдлыштіс бөжнас, сэсся лэбис да пуксис орчча йөрө,
эновтөм картофель гу вылө, видзөдліс гөгөр, чеччыштіс турун
пиө да воши.

Қытчө сийө лои? Васьө вуджис потшөс вомон да гусьоник
кутіс матыстчыны картофель гулань. А юрсьыс пөрччис бать-
ыслысь важ картузсө да лөсьөдчис сийөн тупкыны лэбачөс.

Но сырчик некөн эз вөв.

Обед бөрын мамыс муніс, а Васьө и обед чөжыс думайтіс
сырчик йылысь да өдва вермис терпитнысө, кор мунас мамыс.
Сийө мөвпыштіс, мый сәні, көнкө, тыдалө, эм сырчиклөн поз-
йыс, и колө корсьлыны сийөс.

Но сөмын на сийө матысмис картофель гулань, кытыськө
мыльк вылас лои Кардинал.

— Ня-ав-ав-ав-ву,— скөракодь нюжөдіс сийө да рөдтіс
гу вылысь.

Картофель гуас пыраніныс вөлі тырөма быдсяма лөпнас:

сэні тыдалісны и пөв помьяс, и чагторьяс, туплясисны кирпич торьяс и кольём вося рушмём да сись картупельяс. Оти пөв пом да кирпич тор костті му пытшкас пырис неыджыд розь. Пөв помас да муас розь дорас тыдалісны дзик на выль гыж туйяс.

«Ак, со мый. Кардинал удитлөма нин и татчө!» — думыштіс Васьё, пелькиника весалыштіс розь дорсьыс мусё да пондыліс суйны сэтчө кисё. Қиыс пырис сьёкыда, дзескыда, но кызкө век жө удайтчис суйны гыррдзаөдзыс. И сэк Васьёлөн чуньясыс, кылө, воисны кос турунысь да гөнъясысь тэчөм ичөтик гөгрөсіник позйө. Позйын — Васьё лыддис чуньяснас видлалөмөн: «өтик, мөд, коймөд, нель, вит» — вөліны посньыдик шоныд колькьяс.

— Ня-ав-вуа, — бара кыліс кытөнкө неылын. Васьёөс заводитіс дөзмөдны тайө гөлөсыс.

«Мый сійө тан пыр бергалө! Төдмаліс! Дуксө кыліс! Сырчиксө ещө кутас и колькьяссө судзөдас да сёяс. Мыйкө колө вөчны!»

Сійө сувтіс, чырыштіс каньөс. Сэсся думыштіс да пуктіс розь дорас нөшта кирпич тор, медым лэбачлы позис пырны, а Кардинал эз вермы кодйыны, и котөртис гортас.

Қор сійө корсис сарайысь көрт тувьяс, мөлөт да важ скворечник, кодөс нөшта водз тулыснас на вежис батыс найө льөм садйысь выльөн, да локтіс бөр картупель гу дорө — кирпич торйыд вөлі путкыльтчыштөма. А Кардинал сулаліс неылын да нювсис и видзөдаліс то Васьёлань, то сырчиклань, коді нораа то лэбзыштлас, то усьө турун пиө да кыскө бордьяссө, быттьөкө лэбнысө оз вермы да помея бөрдө:

— Сррчч, сррчч! Сррчч, сррчч!

Васьё видзөдліс каньлань: «Сейөма өмөй нө колькьяссө?» Но кор суйис кисё позйө, сьөлөмыслы лои кокныдджык.

И сійө пырысь-пыр жө заводитіс уджавны. Қайис потшөс вылө да медкузь майөгө, кытчөдз судзис, тувьяліс скворечниктө, медым Кардинал оз вермы сэтчө кайны. Қөсйис позсө кыскыны дзоньнас да пуктыны скворечникас, но нинөм эз артмы: позйыс эськө кыскигас жугласис. Сэк сійө нетшкис турун да пуктіс скворечник пытшкас, кос турун тылымьясысь вөчис поз кодьөс да тожө пуктіс. Сөмын гөнъясыс сылы эз сюрны, а поз артмис шогмана. Васьё өтикаөн кыскаліс колькьяссө

гуысь, недыр шонтыштис киас, пунктис виль поэйё да видзёдліс Кардиналлань: «Онi пö он босьт!»— но Кардинал эз нин тыдав. Сöмын сырчик, недыр кежлö дугдыштлöм бöрын, нораа горзигтыр, быттьökö ранитчöм, бара кыскасис турун пиын.

Кор сийö матысмис матöджык, Васьö перйис скворечникысь öти кольк да, мелiа сёрнитиг, мыччöдліс сылы и пунктис бөр:

— Эн пов. Ме нинöм ог вöч. Со найö кöни, со,— тапкöдыштіс скворечниксö.— Ме муна нин. Терпитышт.— Сийö лэччис потшöс вылысь да вешйис неылö. Но сырчик эз матыстчы скворечник дорö, сöмын лэбзис мусяныс потшöс вылö да, бöжнас качайтигыр, нуöдис ассыс:

— Сррчч-сррчч!

— Ладнö, муна-муна. Эн пов.— И Васьö муніс, долыд, мый мездіс сырчикöс Кардиналысь.

Бöрынджык сийö ветліс сиктса магазинö няньла, сэсса юдорса градъяс вылысь капуста киськаліс да рытöдзыс эз эшты видзöдлыны сырчик вылö. А рытнас эз нин вөрöшит: «Мед овмöдчас». Но кызд сöмын воис асылыс, чуксавтöг чеччис, мыссис, сёйыштіс, кольöдіс батьсö, кодi муніс электростанцияö, да пуксис пöгреб бокö и кутіс видзöдны сэсянь скворечник вылö.

Керкасыс петіс мамыс, тожö мöдöдчöма удж вылö:

— Тэ нö мый сэтчö пуксин? Мун кöть Толейыдкöд ворышт!

— Час. Удита на,— Васьö и ачыс нин эз вермы терпитны, сылы окота вöлі висьтавны Толейлы да Раялы Кардинал да сырчик йылысь (Толей тöрыт батыскöд ветліс видз весавны да сёр рытöдз эз лок, а Рая эз жö некөн вуджрась), но первой окота вöлі аслыс видзöдлыны, мый ставыс лои, кызди вöлі колö.

— Ва дорö кö лэччан, эн ёна купайтчы, эн кынтöдчы,— велöдіс мамыс.— Эн дыр: пöльыдлы, колökö, ковмас мыйкö отсыштны.

— Ы-ы.

И Васьö коли öтнас пöгреб бокын. Пукаліс сийö сэни, гашкö, час, а гашкö, и кыкöс. Пукаліс и мөвпаліс Кардинал йылысь. Мыйла сийö танi ветлöдлö, öд сетö жö сылы Толейлөн мамыс сёянсö: йöвсö сöмын öтчыднас кружка джын, мукöдтор йывсыс и казътывнысö нинöм? Пöтлытöм рушку! Сийö

нөшта и лэбачьяс бөрся кыйсьо?! Васьо думыштіс, кызди Кардинал кыйөдчө, чечыштө сырчик вылө да мурзігтыр нуө нөйтчысь лэбачөс, гусясьысь моз сувталігтырйи да бөрвылас видзөдалігтырйи. Васьо весиг дрөгнитіс татшөм мөвпсьыс да сувтіс, медым видзөдлыны гөгөр. Но матын эз тыдав ни сырчик ачыс, ни эз кывсылөн гөлөсыс. Кардинал эз жө тыдав.

Нөшта недыр пукалыштөм бөрын Васьо вуджис потшөс вомөн картупель гу дорө. Бырисылөн терпенньөыс — матыстчис розь дорө, сюйис кисө: позйис вөлі куш и көдзыд. Сэк сійө радпырысь видзөдліс скворечниклань и виччысьыштіс неуна, а сэсся кайис потшөс вылө. Видзөдліс скворечник пытшкө — ставыс вөлі сідзи, кызди кольліс сійө төрыт, весиг турун за розь дорас чурвидзис сідз жө, кызди төрыт, а пытшкас, позйын, куйлісны сырчик колькъяс, ставыс витнаныс.

И Васьо гөгөрвоис, мый сырчик энөвтіс важ позсө и выляс эз вөв: либө жө выль позйис эз кажитчы лэбачлы, либө жө сійө эз гөгөрво Васьоөс да эз аддзы, а гашкө, Кардинал рытнас кыйөдчис, кутіс да сөйис.

Енэжас и му вылас, кажитчө, лои лөнь, а гашкө, сөмын Васьоылы сідз кажитчис сы вөсна, мый сылы лои гажтөм да забеднө. Аслас көсйытөг сійө нюжөдіс кисө, босьтіс позсьыс сырчик колькъяссө да верзьөмөн пуксис потшөс вылө. Ки пыдөс вылассылөн куйлісны вит лөзоват чутөсь рудов кольк, и сійө эз төд, мый жө вөчны накод. Юрыссылөн лэчыштіс улөджык, да тшөкыдджыка пондісны лапъявны син лысьясыс. Но друг Васьо дрөгнитіс — сылы кажитчис, мый кодкө видзөдө сы вылө. Но некод матігөгөрын эз вөв... не лыддыны кө Кардиналөс, кодлөн гөрдов пасьыс да яндысьтөм виж көпейкаясыс тыдалісны потшөс костөдыс.

— Ня-ав, ня-ао, — миритчанаа и норакодь нин кыкысь нявөстіс сійө потшөс костөд видзөдіг.

— Ак, тэ бара нин тан? Брысь татысь! Час ме тэнө! — Васьо чечыштіс потшөс вылысь да тэрмасигтырйи пондіс корсьны мусьыс из.

Кардинал чепөсйис, гырыся чеччалігтырйи, сэсся сувтыштліс неылын, гөгөрвотөма видзөдліс Васьо вылө и пызйис водзө.

Васьо шыбитіс изсө сы бөрся. Сійө эз көсйи синнас адзыны Кардиналөс.



АСЛЫССЯМА МОРТ

Тайо вöли гожöмнас на. Июль тöлысь заводитчигöн, öти луно, рытланьыс, Васьо суседьясö, Кармановьяс ордö, локтис тöдтöм морт. Васьо ёртьясыскöд туй вылын ворсис мачөн. Выль «Волга» надзмöдис öдсö да сувтис зонкаяс дорö. Ворсöмыд вуні. Челядь кытшалісны машинасö да полігтырйи инмöдчывлісны сылөн бусöссьöм шыльыд веркöсö. Кодсюрö видзöдісны нин көлеса шöрас югьялысь кытшö да гусьöникөн шензисны. Васьо вещьис бокöджык, сувтис потшöс дорö да пондис видзöдны тöдтöм пассажир бöрся.

Пассажир петис машинасысь. Сійö вöли кузь тушаа, Васьöлөн бать ыджда кымын жö, но неуна кызджык да уска. Воыс перйис машина пытшкысь кык чемодан. Öтиыс — ыджыд, прöстöй, лöзов рöма. Мöдыс — неыджыд, коричневöй. Васьöлыдум вылас уси, мый сійö дзык жö татшöмöс аддзывліс школарысь: татшöм чемоданас сэні видзöны аккордеон. Сідзкö, локтысыс — гудöкасысь.

Тöдтöм морт сувтöдис чемоданьясö потшöс бокас Васьöдорö да кинас макнитис шофёрлы:

— Пока!

Челядь пыр и кытшалісны воысьёс.

— Видза оланнды, том йёз котыр!— гораа шуис сійё да ставнысё сюся видзёдаліс.

— Здорово!— вочавидзисны Васьё да ещö öти детинка, а мукöдыс чöв олісны, яндысигтырйи пондісны гырдызаяснаыс тойыштавны öта-мöднысö, зілісны дзёбсьыны ёрта-ёртмыш сайö.

Гöсть, тöдöмысь, казяліс тайöс, та вöсна, буракö, и гажаа шуис:

— Ноко, коді медся збой, висьталöй: этайö керкаас олысьясыс гортасöсь абу?

Сійё кинас индіс Кармановъяс керкалань.

Васьö кöсйис шуны, мый кöзяиныс удж вылын, но аддзис туй вывті локтысь Педöр дядьöс да чуньнас индіс:

— Тонö, Педöр дядь локтö...

Тöдтöм морт видзöдліс локтысь вылö, тэрмасьöмөн шыбитіс потшöс вылö плащсö да пинжаксö, идзас шляпасö чöвтіс Васьö юр вылö да пöшти котөрөн уськөдчис Педöр дядьлы паныд. Васьö аддзыліс, кыдзи найö паныдасисны да кыдзи тöдтöм мортлөн тасöсь дөрöмыс вöйи Педöр дядь пинжак пиö.

— Фёдор!..

— Терентий!..

— Мыйта ва визувтіс...

Аддзысьясыс топыда кутчысьлісны, клопöдісны öта-мöдлы пельпомö, дыр видзöдісны ёрта-ёрт вылас, быттьökö лыддисны, кымын чукур содöма чужöм выланыс «уна ва визувтігас» (Васьö кыськö кывліс, мый аддзысигөн йёз век лыддьöны татшöм чукуръяссö), а сэсся матыстчисны челядь дорö, босьтісны чемоданъяс, паськөм да мөдöдчисны Кармановъяс ордö.

— Шляпатö вунöдіннды,— завор дорын суöдіс найöс Васьö.

— Аттьö,— шуис тöдтöм морт, босьтіс шляпасö да мигнитіс:— Аскиöдз...

Но Васьö тайö рытнас на аддзыліс сійöс. Часөн-джынійөн мысти кымын Педöр дядь да сылөн гöстыс мунісны пывсянö. Регыд тöдтöм морт пасьтöгыс чөпöсйис сэтысь да котөртіс ю дорö, ызгысьліс ваö, купайтчыштіс да бөр котөртіс пывсянö.

А ужнайтігөн Васьолон мамыс да батыс сёрнитісны:

— Осип Педор ордө гөсть локтома.

— Шуоны, сійө пө Педорсө фронт вылын ранитчөм бөрын петкөдөма.

— Абу Педорсө, а Педорыс сійөс. Ме ачым кывлі.

— Ладнө, кодыс кодсө — өткодь,— шуис пөльыс.— Сёрнитөны, сылөн пө зэв уна уджыс, а вот важ другсө аддзөдлыны кадыс сюрөма.

— А мый налы, карсаясыдлы. Командировкаө петіс да деревняө кутшөмкө полномоченнойөн шунькнитіс дай.

Сідзкө, төдтөм мортыс — уполномоченной. Прөстө эз лок «Волганад». Васьолы уси төд вылас, кызди мамыс висьтавліс өти уполномоченной йылысь, коді волөма война дырйи найө сиктө. Сылөн пө вөлөма плеть, кодөн, вөлөм, нөйтө асьсө сапөг гөлень кузяыс скөрысла, а ещө пө өтчюд, уборка дырйи, челядьлысь мырддьөма вотөс да тшак и таялөма. Таысь сійөс удж вывсьыс вөтлөмаөсь да судитөмаөсь. А тайө, тыдалө, мөд пөлөс: модаыс шутлив мортлөн, и пывсянысь пасьтөгыс ю дорө котралө... Гашкө, сійө первойысь на деревняө локтома да оз төд, кызди асьсө кутны?

Асывводзнас гымаліс. Қор Васьө садьмис да петіс кильчө вылас мыссыны, шондыс вермасис нин гымалан кымөр колясьяскөд, зэрөн мыссьөм туруныс нюмъяліс-любуйтчис эзысь лысва мольяснас, а бөрөздаті визувтіс ырөш кодь шор. Васьө лэччис өшинь улө, нургиг-сыылігтыр келіс бөрөздаас и аддзис Кармановьяс пөгреб дорысь төдтөм мортөс. Сійө пукаліс порог вылас да вөлаліс кузь шатин. Сійө казяліс жө Васьөөс, шыасис:

— Эй! Кутшөма узьсис?

Васьө матыстчис вөласысь дорө и гөгөрвоис: төдтөм морт вөчө вугыр шать. Сідзкө, чери кыйны мөдөдчө. Уполномоченной — и чери кыйны... Абу гөгөрвоана. Васьө смелмөдчис да юаліс:

— Дядя, ті уполномоченной?

Төдтөм морт видзөдліс сы вылө читкыра синьясөн:

— Уна кутан төдны — аски гөгийөдзыд тош быдмас. А тэ меным ёнджыка кажитчан тоштөгыс.

— А плеть эм тіян?— эз сетчы Васьө.

— Плеть? Кутшөм плеть?— пельпомьяссө лэптылөмөн

шензис төдтөм морт, сэсся нюмыс исковтис сы чужом вы-
лысь.— Абу. Плетьыд менам абу.— Сийо сувтис, матыстчис
Васьо динө да тувкнитис пельпомас:— Гашкө, төдмасям? Сёр-
нитам-баитам, а өта-мөднымос ог төдөй... Менө шуоны Терен-
тий Максимовичөн. Позьо и прөста Терень дядьон...

— А менө Василей Егоровичөн,— шуис Васьо да сы моз
жө содтис:— Прөстөясө шуоны Васьоөн.

— О-о!— нюждис Терентий Максимович, но дзебис сөдз-
тысьлысь нюмсө:— Ок, и узян жө тэ, Василей Егорович! Тани
тэнад узигкості сэтшөм праздник вөлі... кыз шуласны, музы-
каа фейерверк.

— А мый сийо фейерверкыс?

— Ак да. Сэтшөма, мися, гымалис да чардалис!..

Васьо шензөмөн видзөдис гөсть вылө, а сийо тувкис Ва-
сьолы кынөмас:

— Ладнө, мун тыртышт туистө, сэсся петкөдлан меным
чериа местаяссө. Бур?

— Ы-ы,— сөгласитчис Васьо да чеччалігтырйи котөртис
гортас.

Сьөд ты дорө найо мунисны вөрса трөпаөд, кыти Васьо
ветльвліс батыскөд. Шондыс юис нин пөшти став лысвасө.
Терень дядь көнсюрө сувтавліс да то копыртчөмөн мыйкө ви-
дзөдаліс турун пысь, то малалис кинас паськыд коръя кызь-
яслысь увьяссө, то шлопөдис ки пыдөснас пожом ствольясө да
вомгорулас сьыліс: «Живица, живица...» А өти местаысь, паш-
кыр лапья пөрысь коз да ичөтик пожом пу костысь, найо ад-
дзисны вөрса чераньөн кыөм «шонді».

— Видзөдлам кыйсьысь вылас,— шуис Терень дядь да
пуксис сісьмыны нин заводитөм мыр вылө, зепсьыс кыкис
куритчансө.

Васьо первойсө эз гөгөрво, кутшөм кыйсьысь йылысь му-
нө сёрниыс, бөрынджык нин воис вежөрөдзыс. Черань везйыс
вөрөшитчис төврұсыс да югьялыштис шонді югөр улас. Кыз
сөмын зэрыс абу тшыкөдөма!

Чераньыс некөн эз тыдав.

— Да тайо важся...— пондыліс шуны детинка, но сэк жө
черань везйө люкасис гут, кутіс дзизгыны, мынтөдчыны, но ён-
джыка дзугсис. Пыр жө коз лап вылысь гутлань уськөдчис

ыджыд черань, ноп вылас пöртмасис зэв мичаа рисуйтöм крест. Сійö вöлі сэтшöм ыджыд, мый черань везйыс лайкъялис сьöктасыс. Черань пыр и лои гут дорын, мыйлакö гөгöртöдис сійöс, а сэсса бөр кокъяснас сюся гартыштіс гутсö черань везсыс вöчöм сеткаö, а сы бöрын кымынлатікö ордіс везсö да ассыс кыйдöссö кыкис коз лап вылö.

— Да-а, вөр-валөн аслас вески... Сійö аслысног веситö, медым нинöм лишнöйыс эз вöv,— недыр чöv олöм бöрын шуис Терень дядь да бергöдчис Васьöлань.— Василий Егорович, кыз тэныд кажитчис? Бура кыйсьö? Тадзи кө эськö миянлы чериыд шедас.

— Сійö жö тывйөн, а миян сöмын вугыр шатыяс,— ышловзис Васьö.

— Тывнад быдөн кыйсьысь, а вот вугырнад...— Терень дядь шлочкерис кывнас.— Терпеннö да сям колö!

Кыйсисны первой Сьöд тысь. Сэтысь шеді (Васьö кыкысь лыддис) дас куим неыджыд ёкыш. Сэсса ветлісны Эжва дорö, коді визувтіс сэн жö матын, и сэтысь Терень дядьлы шеді кык компи.

Васьöлы нинöм эз шед, та вöсна сылы регыд дышöдіс. Сійö дугдіс вуграсьны, пуксис му шмак вылö да кутіс видзöдны Терень дядьлөн вуграсьöм вылö.

— Кынöмыд сямалö?

Васьö лэптыштіс пельпомъяссö. Кынöмыс сьлөн збыльысь сямаліс, но эз лысьт веськыда висьтавны та йылысь.

— Оз на?— мудера нюмуніс Терень дядь.— Всё равно пусям. Ок, ме радейта бипур вылын пуöм юкватö!— пуксис Васьöкод орччөн да сёрнитігтыр нопсыс кыскаліс салдатскöй пöрт, нянь тупöсь джын, кымынкö картофель да паньяс.— Тайö Фёдор миянлы пуктіс. Ми сыкод ещö война дырйи окруженіены тайö пöртъяс юква пулім.

Юква и збыльысь артмис чöскыд. Терень дядь сійöс шуис «кык судтаён». Васьöлы тайö вöлі гөгөрвотöм. Терень дядь висьталіс, мый кык судтанас сійö шусьö сы вöсна, мый öти и сійö жö ваын первой пуисны ёкышъяс, а бöрыннас компиянсö.

Ещö вуграсисны час-мöд, медым кыйыштны гортö нуöм вылö, сэсса найö мөдöдчисны бöрсö мунны муяс вомён. Тадзи-сö вöлі ылынджык, но зато этшаджык вильöдасны номъяс. Туйыс кайис мылькйывса вышкалань, а кор матыстчисны

вышка дорö, кытысянь колö вöлі лэччыны сиктлань, Терень дядь сувтис, видзöдліс гөгөр и шензис:

— Вот тайö да-а! Тасянь тай став районыс тыдалö! Вай шойччыштам, а?

Васьö син водзын пласьтвидзисны тöдса местаяс, и, кажитчö, нинöм тані эз вöв сэтшöмыс, медым шуны: «Вот тайö да-а!» Мый тасянь сэтшöм шензянаыс тыдалö? Нинöм. Водз-выланыс Васьöлөн чужан сиктыс. Шуйгавылынджык мöд сикт, кöні шöрас чурвидзö вичко. Водзынджык эм аэродром. Видзöдлыны кö шуйгавыв и веськыдывыв, ыб помасянінас заводитчö öткодь помтöм-дортöм вөр, коді ылын-ылын öтлаасьö енэжыскöд, а бөрвылас тыдалöны Сьöд ты да лöзалан Эжвалөн берегъяс вылын вежöдысь видзьяс. А туй бокьясас гөгөр быдмöны катшасиньяс да пöлудьяс. Ставыс кызди и колö, ставыс тöдса, сы вöсна Васьö и пуксис из вылö. Дерт, оз позь шуны, мый сылы оз кажитчыны чужан сиктдорса местаясыс. Найö мичаöсь. Вот тулыснас сійö ветліс тьöt ордас вөр участокö пöльыскöд и öдва кык лун вермис овны сэні. Эськö мичаöсь жö сэні местаясыс и быд лун кино петкöдлöны, а вот уси дум вылас гортдорса льöм садйыс, кык вой узис — пыр сійöс вöталіс. Пöльыс кольччис, а сылы пышйыны лои. Но «вот тайö да-а!»— эськö эз шу Васьö. Терень дядь, сідзкö, таысь мича местаяссö абу на аддзылöма? Сійö пондис видзöдны Терень дядь бöрся. Терень дядь то матыстчывлас Васьöлань, то вешйыштлас. Кинас пыр сю шепьяссö да заяссö вөрöшитö-малалö. То найöс дукуштлас, то мусö кияс босьтлас да шамралö, чуньяс косттыс лэдзö, то видзöдö кытчöкö сю море вывтйыс ылö-ылö, быттьöкö вот-вот паськөдас сывсö и качөдчас енэжас... Сэтшöм сылөн синъясыс и чужöмыс кыпидöсь! А сэсся тай кызди збыльысь паськөдас кияссö да горөдас:

— Ого-го-го-о!

Виччысьтöмысла Васьö весиг дрөгмуні, а Терень дядь видзöдліс сы вылö да гораа серöктис, нетшыштіс кымынкö пöлудь да катшасин дзоридз и нюжөдіс сылы:

— На, да эн дöзмы повзьөдöмысь. Тэ тöдан, мыйся тайö дзоридзьяс?

— Код найöс оз тöд,— шуис Васьö.— Этійö катшасин, а сійö со пöлудь.

— «Катшасин»... «пöлудь», вот тэныд и на! Тайö, другö,

лекарственной турунъяс. Важ йоз катшасинъяссыс заваритом васо кыном висьомыс юлывлёмаось. Видзодлы, кутшом найо мичаось, быттьокко балеринаяс йоктоны товру улас. А полудьяснас син висьомыс лечитчывлёмаось. Гашко, сы всна и онодз на консюро найос шуоны мулон синъясон. Вот кутшом делояс, друго... А сю шепьяс горддзасьоны нин, Василий Егорович.

Терень дядь тапнитис Васьолы пельпомас:

— Став сертияс тыдало — таво йортодьяс лоасны тырось.

Рытнас Васьо юрын жуисны мовпьяс. Сылы дум выло усины сийо выльторьясыс, кодьясос Терень дядь висьталис черияс йылысь. Вёлөмкө, ком тожө хищной, горш чери, сейо ёс да мукөд черияслысь поксо, а Васьо та йылысь онодз эз тод. Эз тод сийо и «кык судта» юква йылысь, катшасинъясысь, мукөд турунъясысь да дзоридзясысь уна полос лекарстваяс вочом йылысь. Мыйла Терень дядь ставсо тайос тодо? И коди сийо ачыс? Абу кө уполномоченной, гашко, агроном? Эз од, конкө, проста сю шепьяссө малав да мусо чунь костьясас крошит... А гашко, сийо врач да? Од лекарстваяс вочом йывсысь тодо жо. И аккордеон вайис, а некор ворсом он кывлы. Вoryн пуясон интересуйтчис и чераньон тшотш... Мукөд йозыс кызкө ставыс гогорвоанаось. Босьтам батьос. Электростанцияын техникон уджало, и ставыс тодоны, мый сийо техник. Педор дядь конюхон уджало, и ставон жо тодоны сийос, кызди конюхос. А Терень дядь?

Васьо сиди и унмовсис, Терень дядьос тодмавтөг.

Та бoryн найо некымын лун эз аддзысьлыны. Видзяс вылын заводитчис турун пуктом, и Васьо тшотш модис отсасыны сәни: быд лун вөлөн юр кыскалис. А Терень дядь кытчокө вошли. Васьолы сэтшом окота вөли ошйысьны сылы турун пуктомнас, висьтавыны, кутшом гажа да кыпыд уджавны видзяс вылын, мыйта сәни быдмома быдсяма дзоридзис да кутшом чоскыд туруныслон корыс — весиг кодзаны-кольмыны верман. А юръяс кыскаломыс! Вот кони «вот тайо даыс!» Но Терень дядь эз вöv: Педор дядь висьталис, мый сийо мунома вөр участкакө.

Оти лун вөли дзик нин терпитны позьтом жар. Васьо витьс купайтчис, но и тайо эз отсав. Вöv вылын пукавыны эз кут

позны (вөв чужъясис лөддзёсьысла), и Васьё новлөдліс сійёс дом повододыс. Рытланьыс сійё сэтшөма мудзис, мый весиг вуграліс ужнайтігөн. И, колөкө, эськө дзикөдз унмовсис, эз кө кыв бать-мамлысь сёрнисё.

— Олө мортыд вольной свет вылын и оз төд, көні мый сійёс виччысьё,— шуис батысь.

— Мый нө лоис?— төждысян гөлөсөн юалис мамыс.

— Ме ылі видз вылын зорөд чөвті. Неылын Педөр да сылөн другыс ытшкисны. Куритчигөн, видзөда да, на дінө директорлөн машинаыс локтіс. Вөлөмкө, Педөрлөн другыс сьөлөмнас висьмөма, больничаө нуисны.

Васьёлысь быттьөкө бокө пöлыштисны унзільсö.

— Терень дядьёс?— горөдіс сійё.

Асывнас Васьё висьталіс батысьлы, мый сійё мунас видзьяс вылө сёрөнджык: колө пö ветлыны школаө, нуны школаса коллекцияө чукөртөм изъяс. Батысь сөгласитчис, а мамыс быттьөкө лыддис Васьёлысь думъяссö.

— Тэ көть пыравлы больницаас мортсö видлыны,— шуис сійё.— Ме шаньгаяс пукта.

Больница вөлі школаө муна туй дорын, и Васьё, дерт жö, первой пырис сэтчö. Сійёс пыр жö лэдзисны ыджыд югыд палатаө. Нель койка пиысь öти вылын куйліс Терень дядь. Сылөн кельыдруд рөма синъясыс муртса вöйыштöмаöсь, но укыс нюмъяліс важ мозыс.

— А-а, Василей Егорович!— кыпыда шыасис висьысь да индіс койка дорас сулалысь табуретка вылө.— Лок пуксы татчö.

Васьё пуксис, Терень дядьлы мыччис шаньгаяссö.

— Шаньгаяс?!— шензис висьысь, босьтіс öти шаньга да курчис.— Кутшөм чöскыд! Весиг вонын сылө. Босьт вай, сөй ачыд тшöтш. А зепъясад шаньгаяс жö?— индіс Васьөлөн пöльтчөм пинжак зепъяс вылө.

— Абу,— юрсö пыркөдіс Васьё.— Тайö школаса коллекцияө изъяс...

— Тэ нө изъясөн интересуйтчан? Гашкө, тэ и аддзин эсіё гежөда сюрлысь метеоритсö да, код йылысь тай газетö гижлісны?

— Ме эг öтнам, ёртъяскөд,— яндысьөмпырысь вочавидзис Васьё.

— Но, геолог, вай мыччөдлы, мый тэнад зептад. Ме ра-
дейта жө корсюрө видзөдлыны на вылө. Сідз-сідз. Тайө со
кварц,— шуалис сійө изъяссө тумбочка вылө пукталіг.—
А этайө кальцит — зэв интересной из, шусьө исландской шпа-
төн,— кымын водзө, сымын гажмис Терень дядь.— Нолтө,
мыччыв эсійө газетсө. Тайө изйыслөн эм аслас свойство. Сійө
быттьөкө поткөдө сы вылө усьысь лучьяссө, артмөдө өти ги-
жөдсьыс кык өткодь гижөд. Со, видзөдлы татчө... Қолөкө, ме
тайө из йывсьыс тэныд висьтала өти интереснойтор.

— Висьтав,— Васьөлөн öзйыштлісны синьясыс.

— Но, кывзы, сідзкө,— заводитіс Терень дядь.— Коркө
важөн нин өти странаын овлөма зэв горш да асьсө радейтысь
царь. Сылөн вөлөма зэв уна озырлуныс, но пыр кажитчөма
этша. Думыштчас царь, кызди эськө лоны нөшта на озырджи-
көн, медым сы йылысь став му вылас төдісны, и сылы дум вы-
лас усьө, мый тайө изйыд, пырыс кө видзөдлан, быдтор кык
мында петкөдлө. Ас дорас корас изйысь вөчасысь мастерөс да
тшөктас: «Вөч тайө изсьыс менам дворец гөгөр стен. Вөчан —
зөлөтита, он вөч — юртө керышта». Дыр уджаліс мастерад и
вөчис стентө, но царыд пөръяліс: медым мастерад оз висьтав
йөзыслы изйыдлысь тайнасө, босьтіс да, зөлөтитөм пыдди, ке-
рыштіс юрсө. Тадзи мастерлөн гөтырыс лои дөваөн, а пиыс си-
рөтаөн. Сьөкыда колины луньясыс да войясыс, а кор мастер-
ыдлөн пиыс быдмис, мамыс висьталіс сылы, кызди царь пөр-
ъяліс да виис сылысь батьсө. Пи көсйысис босьтны водзөс бать-
сө виөмысь. Сійө муніс дворец дорө, матыстчис стен бердө и
аддзө: стен саяс царыдлөн шензьымөн уна озырлуныс и вой-
скаыс. Но сійө эз повзы, кулакнас зымгис стенас. Некод сы-
лы эз восьты. Сэки мастерлөн пиыс босьтіс гортсьыс батьыс-
лысь вөчасян мөлөт-киркасө да бара локтіс стен дорад. Куч-
кис — стенад сөмын посныдик визьяс лоисны. Қоймөд луннас
найө мунісны мамыскөд кыкөн. Пиыс бара кутіс стучитны-
гольөдчыны, но бара некод налы эз восьты. Сэки быри мамыс-
лөн терпенньөыс, нөровтчис верөсөн вөчөм стен бердад и шо-
гысла да өбидайсла бөрддзис кыз синваөн. И друг пиыс казя-
ліс, мый мамыслөн синваысь из стеныд быттьөкө пузис да
пондіс сывны. Сэтшөма бөрдіс дөваыд, сы мында синва кись-
тіс, мый стенад вель ыджыд розь лои. Мастерадлөн пиыс пы-
рис тайө розьбдыс пытшкас и казяліс, мый абу нин сэтшөм

страшнõй царыд, кыдзи кажитчис ортсысянныс, и войскаыс сылõн абу вывтї уна. Писькõдчис сїё охрана пырыс дворецад да виис цартõ, а из стентõ пасьйис-жугліс, рõвняйтїс муыскõд. Сэтшõм зїля сїё уджалїс, мый стенсыд торпыригьясыс став му пасьтаыс сьавкїйсны-лэбисны, а дворецõ челядьлы сетїс. Отсасисны сылы тайõ ыджыд уджас и кузнечьяс, и столярьяс, и плõtникьяс, и му дорын уджалысь крестьяна, и уна мукõд... Тыдалõ, стенсыс õти тор и лэбзьõма татчõдз да сюри тэныд. Гõгõрвоин? Қор сы вылõ солянõй кислота войтыштõдан — пузьõ, заводитõ руавны, сылõ кислотасыс. А збыль вылас тайõ колана из, сїёс микроскопьясõ да кутшõмсюрõ мукõд приборьясõ пукталõны заводьясын...

Васьõ эськõ и водзõ на окотитїс кывзыны Терень дядьлысь висьталõмсõ, но локтїс сестра да тшõктїс мунны: регыд пõ локтас врач да видчыны кутас. Мунїгас Васьõ Терень дядьлы и мукõдыслы ыджыд морт моз шуис:

— Бурдõдчõй õдїõджык.

Õдзõсõдыс петїгõн нин суõдїс Терень дядьлõн горõдõмыс:

— Ладнõ! Ми ещõ ветлам на тэкõд изьястõ чукõртны! Аттьõ шаньгаяссыд!

Но изьяс чукõртны ветлõмныс эз нин ло: Терень дядьлы эз сюр кадыс. Больничаясь петõм бõрын сїё нуõдліс Васьõс кино видзõдны сõмын. Қиноыс вõлі «Высокая награда» — шпионьяс йылысь да сы йылысь, кыдзи найõс чекистьяс кутїсны. Сэні вõлі тшõтш Васьõ кодь кымын детинка. Васьõ видзõдїс киносõ син лапнитлытõг, а Терень дядь пукаліс орччõн да экран югõр улас мыйкõ пасьяліс аслас блокнотõ. Қор петїсны клубысь, сїё юалїс Васьõлысь:

— Но, кыдзи? Кажитчис али эз киноыс?

— Ы-ы, кажитчис... А тї мыйла эн видзõдõй?

— Ме коркõ видзõдлі нин.

— Видзõдлінныд, а бара пыринныд?

— Но тэ жõ эн на видзõдлы,— Терень дядь дзугис Васьõлысь кымõс вывсьыс юрсисõ, сэсся корис:— Пыралам ме ордõ?

Терень дядьлõн комнатаас — Қармановьяс меститõмаõсь сїёс горничаас — ставыс вõлі руз-раз: койка вылас, пызан вылас и весиг джоджас — быдлаын кыдз веськалõ куйлісны бумага листьяс, сэн жõ, пызан кок дорас, куйліс восьса чемо-

дан, кӧні тыдалісны книгаяс, а пызан вылас, бумагаяс пиын, куйліс мӧд чемоданыс, кӧні, Васьӧ чайтӧм серти, вӧлі аккордеон.

— Терень дядь, ті музыкант?

— Да, патефонӧн ворса,— нюмъяліс Терень дядь.

— А мыйла, сідзкӧ, аккордеонсӧ новлӧдланнӧд?

— Да тайӧ жӧ машинка.— Терень дядь воськовтіс пызанланьыс, лэптіс вевтсӧ, и Васьӧ син водзын тыдовтчис збыльысь эз аккордеон, а мӧдтор, кӧні сылы гӧгӧрвоанаӧсь вӧліны букваяс, кодъясӧс гижалӧма вӧлі посныдик кизь кодьяс вылӧ. Сылысь чужӧмсӧ казялӧм бӧрын Терень дядь стӧчмӧдіс:

— Тайӧн позьӧ печатайтны. Вот, шуам,— и сійӧ пондіс кучкавны чуньнас кизь кодьясас. Бумага вылас вочасӧн артмис: «Василий Егорович».— Аддзан?

— Да,— шуис Васьӧ, и кызкӧ мӧд пӧлӧс синьясӧн нин бара котӧртис комнатасӧ. Сідзкӧ, тайӧ абу аккордеон, а машинка, кодӧн позьӧ печатайтны еджыд бумага вылӧ пӧшти сідз жӧ, кызди и книгагасын. Сійӧ век жӧ казяліс, мый комната пасьята куйлысь бумага листьяс вылас мыйкӧ гижӧма. Сійӧ копыртчыліс, босьтіс ӧти лист и ас кежас лыддис: «Локтӧй рытланьыс лесник керкаӧ и сәні сәрнитчам, кодлы кытчӧ мунны, да ружьенытӧ эн вунӧдӧй». И Васьӧлы друг дум вылас воис киноыс, вирдыштис мӧвп: гашкӧ, Терень дядь сәтшӧмьяс пиысь жӧ да? Гашкӧ, шпион?! Аккордеон пыдди ящикас печатнӧй машинка... Он куж и думыштны. Васьӧлӧн весиг кодзавліс мышкуыс. Абу ӧд, кӧнкӧ, прӧстӧ сійӧ кутшӧмкӧ гӧгӧрвотӧм, аслыссяма, унатор тӧдӧ. И этійӧ бумагавывса гижӧдыс... Но недыр мысти сійӧ кокныдджыка ышловзис. Абу, оз вермы лоны: сійӧ жӧ Педӧр дядькӧд ӧтлаын воуйтлӧма... Тані Терень дядь торкис сылысь мӧвпьяссӧ:

— Мый нӧ тә, Василей Егорович, руалін? Вай бӧр шондiавлы! Волан аски менӧ колльӧдны? Меным, другӧ, пӧра воис гортлань восьлавны.

Васьӧ гогнитис юрнас.

Сідзкӧ, Терень дядь аски мунӧ нин. Сідзи Васьӧлы эз и удайтчы тӧдмавны сійӧс. Детинкалы друг лои забеднӧ, и сійӧ котӧрӧн петис ывлаӧ.

Но Терень дядьӧс колльӧдны Васьӧ мунис аэродром вылӧ.

Самолёт дорас нин ыджыд морт моз, киасьомён, прöщайтчис Терень дядькөд да весиг шуис:

— Бур туй!

А Терень дядь Педөр дядькөд кутчысьлём бöрын пырис самолётö да сэсянь нин восьса öдзöсöдыс горöдис:

— Радейт, Васьö, вөр-васö, сийö — интересной штука!..

Тайö вöли гожöмнас, июль тöлысьын, а öни, Выль во водз-вылын, сиктса почтальон Марья тьötка вайис Васьöлы бандероль. Детинка некор на öти письмö эз пöлучитлы аслас ним вылö, а тани виччысьтөг воис дзонь бандероль. Гортö öтнасөн кольём бöрын сийö надзöникөн, лов шысö кутигтыр восьтис бандерольсö и аддзис сэтысь руд мышка неыджыд книга. Книга корка вылö вöли рисуйтöма вөр, а улынджык — гижöд. Васьö лыддис: «Терентий Жангуров. Лысваöсь туйяс». Сэсся бергöд-лыштис киас книгасö да весиг дукуштлис. Сэтысь кылис клей дук. Восьтис медводдза лист боксö. Первойөн, мый аддзис сэтысь, вöли Терень дядьлөн фотокарточкаыс, көни сийö вöли дзик гожся кодьыс: тасöсь дөрöма, идзас шляпаа, сьöдов уска, нюмъялö... А орччөн, мөд лист бокас, вöли пасйöма чернилаөн: «Менам друглы, Василий Егоровичлы, став сьöлөмсянь тайö книгасö». Тайö нö мый, ачыс... книгасö? Вот, сідзкö, мыйла сылы машинкаыс...

Васьö ещö öтчыд лыддис гижöдсö, сэсся öдйö листалис ставнас книгасö, но прамöя эз видзöд, сы вöсна мый виччысь-тöмысла морöсас кыпалис вöвлытöм радлун. Детинка пыр на эз эскы аслас синъяслы. Сийö öдйöджык бара восьтис да видзöдлис гижöдсö. Да, турунвиж чернилаөн збыльысь вöли гижöма: «Менам друглы...»





ВИЛЫШ ӨСЬТУК

Муртса на Васьö удитіс пуксыны пызан сайö выльöв кринча дорö да босьтны пань — посводзас, кылö, мыйкö сяркнитіс, быттьö кодикö содзтыр из джоджас койыштіс, а сэсся и кильчö пос кузяыс тшöтш.

Пöльыс (сійö вöлі лабич дорас пукалö, кöті утъялö) ру-жöктігтыр кыпöдчыштліс табурет вывсьыс, видзöдліс öшинь пыр ывлаö да, вомсьыс дратвасö перйытöг, шуис:

— Мокасьтыд, посводз öдзöссö игнавтöг кольсьöма да бара нин Öсьтукыд пакöститчö. Нолтö, Василей, пиук, петав да нёрйышт. Да заворсö первой восьты...

Васьö лэбыштіс кильчö вылö. Збыльысь, öшинь улын, табак град шöрын, сулаліс Öсьтук да тэрмасьöмөн ас гөгöрсьыс вом тырнас кватлаліс паськыд коръяс. Васьöос быттьö эз и казавлы, горöдöмсö сылысь эз кывлы ни. Кажитчö, горöдöм бöрас нöшта на зільджыка пондіс йирсыны.

Вот öд кутшöм! Сэні жö, орчча градъяс вылын, и лук, и чеснок, и морковь, и капуста, и картопель быдмö, а пырас кö йöрас — табак град вылö и уськөдчö! Васьöлы эськö ньöти абу

жаль табакыс, мед сѣяс, колѳ кѳ, да ѳд висьмыны вермас. А табакнас, тайѳ заразанас, Васьѳлы пыр лоѳ ноксыны. Пѳльыс быд во пуктѳ сійѳс, магазиннѳй папирос-сигаретсѳ оз радейт да. И гожѳмбыд Васьѳлы лоѳ нетшкыны сылысь дзоридзьяссѳ, а тайѳ яд йылѳмыс зѳв ѳдйѳ нюжалѳ — и Васьѳлѳн киясыс пыр табак сирѳсь да вижѳсь куритчыслѳн моз. Магазинѳ кѳ ковмывлѳ ветлыны няньла ли мыйла ли — кисѳ оз и лѳптывлы прилавок вылас да и пыр зильѳ, мед эськѳ учителяс эз паныдасыны. Куритѳны тай нѳшта татшѳм зеллясѳ да и чѳс-масьѳны на гырысыясыд! Вот арланыс, кор пѳльыс табак урожайсѳ кералас, косьтас да крѳшитас, гашкѳ, деревнясыс став мужикыс воласны видлынысѳ да. Да ѳд и ошкѳны: крепыд пѳ, ѳн пѳ! А пѳльыслы нимкодь, гѳститѳдчѳ: тайѳ пѳ одеколѳна сорт, тайѳ пѳ аниса, тайѳ пѳ сѳтѳр кор сора, тайѳ пѳ нѳшта сѳтшѳмтѳ аслыспѳлѳс. Керкааныс табак тшынсьыс юрыс кольмывлѳ Васьѳлѳн. Мамыс эськѳ увгывлас жѳ да, пѳльыс быд во садитѳ да татшѳм табак «праздниксѳ» вѳчѳ.

Васьѳ гурйив восьтис заворсѳ, кватитис пос помсыс гѳлик да пондис надзѳник матыстчыны Ѳсьтуклань. А Ѳсьтук сійѳс быттѳ ѳз и аддзы, азыма мырсьѳ табак корьясѳн, гашкѳ, курчавтѳг и ньылалѳ да, код тѳдас.

Но сѳмын на Васьѳ кийн гѳлиkyс кыптис сынѳдас, Ѳсьтук весыштис нин места вьвсыс, но чѳпѳсйигас вом тырнас нѳшта нетшыштис на. Гѳнитис заворѳд улич вылѳ метра дас сайѳ, пельяссѳ бѳрвыв жмитѳма, сувтис, бергѳдчис Васьѳлань, бакѳстис рѳмидзтѳгтыр:

— Бе-е-е!

Мый тайѳ «бе-е-е»-нас шуис: либѳ эльтис Васьѳѳс, ѳн пѳ судз гѳликнад, либѳ корис котралыштны, сюдны сійѳс — гѳгѳрвоны вѳли сьѳкыд.

Васьѳ некутшѳм скѳрлунтѳг грѳзитыштис сылы кулаknас:
— Час ме тѳнѳ! Сюрлан на! — да игналис заворсѳ.

А Ѳсьтук быттѳ тайѳс и виччысьѳма: юрсѳ гогйѳдлѳгтыр смела матыстчис (ѳнѳ пѳ тѳ потшѳс сайын, он слѳймы пыр петны да нѳйтны!), юрсѳ суйис завор тас костѳд да некымынысь кыскыштис нырнас сынѳдсѳ, Васьѳлань видзѳдѳгтыр. А синьясыс вѳлины сѳтшѳм сѳстѳмѳсь, быттѳ ѳнѳдз некутшѳм мыж сійѳ эз и вѳчлы, и сѳмын дзик ѳнѳ аддзис Васьѳѳс.

— Бе-е,— мелѳа бакѳстис сійѳ.

— Но и мудер руч жö тэ!— Васьöлөн петис нюмыс, сийö малыштис Öсьтукöс пель сайтис, сыли кузяыс.— Ок, эськö някырта кö тэнö — тöдлан сэки!— но ыж тöдис нин, буракö, мый нинöм лёкыс оз ло, кватитис Васьöлысь чуньсö да заводитис нёнявны-няклявны.

...Тайö аслысьяма ыжыс овмöдчис Васьöясö кольöм во нин: март тöлысья рытö мамыс локтис удж вылысь да пась питшöгсьыс перйис нейджыд дöра тубрас. Ньöжйöник пуктис тубрассö джоджö да разис. Васьö некыдз эз куж думыштни, мый сэни вермас лоны кодкö ловъя, а, вöлöмакö, зэв читкыльöсь сьöд гöна баляпи, кодлөн кымöс шöрас тыдалис еджыдин: быттö кодкö краситöма сийöс сьöд краскаөн да то ли краскаыс кымöсас вылö абу тырмöма, то ли нарошнö мича вылö мавттöг сэтi кольöма.

— Вот овмöс содтöд вайи,— висьталис мамыс.— Ыжыс пö куимöс вайöма да тайöс öтдортö, нинöмысь оз кöсйи вердны. Ыж видзысьыс и тшöктис: куланинысь пö, Лида, босьт, гашкö пö бур сьöлөм дорад шонтан да ловзяс. Меным жаль лой — со и босьти,— а ачыс видзöдлас то баляпи вылö, то гортсаяс вылас: мый пö бара шуасны.

Батыс Васьöлөн вöли кыö кулөм. Пырысь-пыр жö бергöдчис улöс вылас.

— Татшöмыд öд, көнкö, весиг сёйнысö на оз куж? Няк помысь нёньöдны ковмас.

Пöлыс вöли газет лыддьö, öчкиасьöма да, но сюся пуктис газетсö пызан вылас, а öчкисö лэптис плешкас:

— Сарай пельöсын вöли папирос ящик, кодкөлун лавкаысь вайли — быттö тöдсьöма та шöрö-водзö. Ок, лоö петны да пыртны выль олысьлы,— а ачыс чеччигмозыс нюмъялö, тошкыс весиг водзланьö чургöдчыштöма.

Мамыслөн весиг чужöмыс югдис, тэрмасьöмөн заводитис пöрччысьны. Васьöлы нимкодъ жö, сылы телепит нин малыштни тайö дрöжжитысь ёкмыльсö, инмöдчис кинас, но повзьöдис. Баляпи заводитлис сувтны кок йылас, но сылөн тайö эз артмы. Мамыс öлөдис Васьöös:

— Тэ эн дöсадитчы сылы. Час, петавла, лысьтышта Серöдöс да вердышта шоныд йöвнас...

Коли тöлысь кык, и тайö каднас баляпи сöвмыштитис. Первойсö, дерт, прамöя ноксьыны ковмис сёйны велöдигас, а сэсья

ачыс кутіс корны: папирос ящикас кө — баксыны пондас вөс-
ныдик нориник гөлөснас, вунөдінныд пө менө, а джоджө кө
лэдзласны — пыр и локтас да кокад нырнас кутас тувкйыны,
вайө пө өдйөджык йөвтө.

Мыйөн быдмыштіс, пыр и вильышмыны кутіс. Ящикад
эз кут йөрмыны: либө пөрөдас, либө чеччыштас сэтысь да сэт-
шөм пелька, мый кокъясыс некытчө оз инмывны. Марляөн
тупкывлісны ящиксө — эз отсав, кыскис марлясө да някляліс.
Сэсся джодж кузя отарө-мөдарө гөнййтлыны зільө, тувгөдөм
кокъясөн вывлань чеччыштлас, краситөм джоджыс вильыд и
усьлас, сувтас да бара дурө. Дурас, дурас да өрекцияс гу-уз!
кисьтас, и сөмын пельяссө вөрөшитө. А Васьөлы тайөс чукөрт-
ны да весавны! Васьө сыөн эськө радейтө лелькуйтчыны, но
бөрьяторсө оз радейт.

Сэсся и ним баляпины лои. Кыдзкө Васьө шуис сійөс Өсь-
тукөн, а мөдыс пондіс шыасыны да локны тадзи корөм вылас.
Мамыс эськө шуліс жө да:

— Йөюк! Өсьтнас жө гырысь ыжъясөс чуксалөны, да и
кутшөм али ним тайө. Скодитанаөсджык да мичаджыкөс
корсь, — но сідзи и коли.

А өтчөд, май помланыыс нин, Васьө локтіс школаысь да
чуймис: батысь гач зепьясас кияссө сюялөма да өшинь дорын
сулалө и видзөдө кытчөкө ывлаас, мамыслөн синъясыс ваось
на, бөрдөма, тыдалө; пөлыс паччөр дорас кайөма да сэні, кы-
лө, нускө. Оз сөрнитны. Васьө локтөдз, буракө, вывтіджык
гораа сөрнитөмаось.

Вөлөмкө, Өсьтук батыслысь кыанторсө — кулөмсө —
ставнас шогмытөмөдз няклялөма.

Сійө лунсяныыс Өсьтук сэсся Серөдкөд картаын кутіс ов-
ны, да и сэні асьсө ыджыдөн лыддис: мукөд дырйиыс, кор ма-
мыс налы сөянсө отувья ворйө кисьтас, Серөдсө люкалө. Дерт,
Серөд пыдди оз пукты тайөс, сылы өд, ыджыд мөслы, балялөн
люкыштөмыд ном курчөм кодь жө көнкө, сөмын меліа ымөс-
тыштас да юрнас пыркнитлас, повзьөдө быттьө. А кор найөс
лугө кутісны лэдзлыны, Өсьтук пыр медводзын мунө и локтө,
быттьө мөсьяс пиас медыджыдыс да сэтшөм важнөя восьла-
лө — видзөдлан да серөктан. Сылы мукөд ыжъяс дінөдз и де-
лө абу. Матыстчыны кө кутлас кодкө на пиысь, либө люкыш-
тас, либө надзөникөн бокө руныгас-мунас. А друг кө мөсь-

ясысь ылалас, то Васьö бөрся либö мамыс бөрся вöтлысьö. И град йöрьясьö, сурас кö потшöсьясас ыджыджык кост, пырны велалис.

Коркö, юсайса видзьяссьö тай пуктöны вöли-а, Васьö мамыскöд турун куртны мöдöдчисны. Мунисны нин вель ылö горт дінсяньыс. Васьö бөрвыс видзöдліс и аддзö: на бөрся Öсьтук гөнитö. Ылын на. Думыштисны дзедьсыны сысь, мед оз вöтчы. Пырисны неылö вөрö да понöль сайсянь видзöдöны. Öсьтук гөнитліс водзö туй кузяыс, сэсся недыр мысти баксігтырйй бөр пызйыштис. Гөнитліс кытчöдзкö бөр да бара, кылö, матысмыны кутис, а весьтаныс воис да кыз тай некымынысь чеччыштлас да «бол-бол-бе-е»-нитас. Быттьö шуö, кöнкö пö тай нö танöсь жö нин-а, мый пö дзедьсянныд! Сералигтырйй петисны дзедьбасысь, сідз куимөн водзö и мöдисны.

А кор ю дорö воисны, Öсьтукöс пыжö эз сөвтöдны, ичöтик веткисö пö гумас, гашкö, да. Колисны таладор берегас. А Öсьтук бара заводитис берег дортыс гөнйайтлыны бөрö-водзö. Баксö да чеччалö. Да оз öмöй уна ног да нораа.

Пыжныс мöдар берегас воис, и мамыслөн жалыс петис: корам пö. А Васьö полö: ваыс визув, неважөнся зэрьясысь туöма, Öсьтукыс пöдны вермас. Шуис мамыслы, эн пö кор.

— Зэв нораа бөрдö да.

— Мед бөрдö кö. Рытнас öд локтам. Мед йирсяс, виччысяс мянöс.

Но мамыс эз кывзысь Васьöлысь, шуис зэв меліа, небыдика:

— Лок нö, шöвк тугйöй, лок, сідзкö...

Öсьтук кыліс шуöмсö, кынмывліс места вылас, сэсся гөнитліс ва дорсяньыс бужöдöдзыс, öдöбтис сэсянь да ыджыда-ыджыда чеччалігтырйй бузгысис ваас — саявлі быдсөн. Эз тай ков мöдысь корöм.

Визулыс тай кызди кватитис сійöс, кылöдны кутис. Уйö Öсьтук, а кажитчö, водзö оз во. Бакöсталö, а гөлөсас полөм кылö. Ас тöдлытöгыс Васьöлөн киясыс вөрöшитчыны жö заводитисны варччигөн моз, быттьö тадзи отсасьö Öсьтуклы. Вот, буракö, сійö ю шөрланьыс нин воис. Но кызди кылöдö!— гашкö, кыксё метра нин горув нуис. Васьö мунö кывтыд берег пöлöныс, шлаккөдö асьсö бокъясас да гусьöник шуалö:

— Но, но, öдйöджык, öдйöджык!

Муртса оз бёрд. Мамыс повзьёма жö, сы бёрся локтö, абу нин, тыдалö, рад, мый тадзи делöйс лои.

А Öсьтукöс, кöть сійö и вель ёна нин матысмис, кылöдö да кылöдö. А горувтыс сэсса берегыс ва дорöдзис баддя, лыаыс оз тыдав, бердöма ва улас. Нуас кö сэтчöдз — кызди берегас каяс? Васьö гораджыка кутис корны, а синваыс войталö и юрси йылöдзис пöсялис.

И со Öсьтук кылис сылысь гөлөссö, выныштчис ёнджыка, сюсьджыка пондис вөрöшитны кокъяссö... Матын нин со. Нöшта неуна, нöшта... Бөрпом кокъясыс муас судзисны, надзöникөн петис ваысь: мудзöма. Тшук эз и во баддяинöдзис! Васьö сöмын сэк казялис ассыс тиралöмсö да выныс бырöмла пуксис-уси лыа вылас, чышкыштитис син доръяссö.

Öсьтук пыркнитчис некымынысь, мездысис ва войтъясысь, бе-е-нитис, матыстчис Васьö дорö да нетшыштитис вом доръяснас пинжак соскöдыс: эн пö бёрд, ме пö тані нин. Васьö эз вермы кутчысьнысö да топöдлитис Öсьтукöс бердас, жмитчывлитис воча чужöм, но мöдыслы тайö, буракö, эз кажитчы: Васьöös нешыштитис пельöдыс.

— Ак тэ кутшöм! Вот ме тэнö! — нимкодпырысь горöдис Васьö пышйысь Öсьтукöс сүөдны зырöдигтырийи да сöмын сэк кыйкнитлитис мамыслань: мамыс сулалис насянь небылын мыжа морт моз.

Куртигкостіныс Öсьтук кытчöкö вошли на дінысь, а корчукöртчисны бригадаса уджалысьяс öбöдайтанинаныс, то зык артмывлитис. Öти нывбаба, кылö, шуис:

— Сумкаын тай нö нянь вöлі-а. Абу.

И мöд шыасис:

— Менсьым кодкö бидонысь йöв кисьтöма.

И нöшта некымынөн:

— Менам шаньгаясöй абу жö.

— Тайö, дерт, поснияс пакöститчöмаöсь. Сёяныд оз тырмы, тшыгöсь — горшасьöны! Ноко, кодлөн пельныд медгöрд?

— Висьтасьöй!

— Вот öд кутшöмöсь!

И ставныс бергöдчисны нывкаяс да зонкаяслань, кутисны дивитана синъясөн видзöдны да видны, а поснияс сулалöны шемöсöсь, повзьыштöмаöсь. На пиын и Васьö тшöтш. Недыр кад тадзи коли, и друг Васьöлы дум вылас уси, мый öбöдöдз

Осьтук кытчөкө саявліс на дінысь, кутіс корсьны сійөс синъяс-нас. Видзөдө да: сійө льөм куст дорө водөма, гож сайө, йөзсьыс бокөджык. А кынөмыс ыджыд, пөльтчөма, весиг сьөкыда лолалө.

Йөз увгыштисны на, но вочасөн лөнисны. Сэк Васьө надзөник, мед некод оз казаяв да гөгөрво, коді главнөй мыжаыс, матыстчис. Осьтук дорө да дөрөдыштис сійөс пельөдыс, гусьөн-ник буркнитіс:

— Юр янөдысь! Туруныс оз тырмы!— сэсся пуксис Осьтук дінө, аснас сайөдіс йөзсьыс, мед оз казаявны ыжлысь пөльтчөм кынөмсө: казаясласны кө — вермасны нөйтны.

Тайө лунсяныыс Осьтук нөшта на ёнджыка пондіс вөтлысьны Васьө бөрся. Лым усьтөдз, кытчөдз сійөс гидө эз йөртны төвйыны, быд лун вөлі школаөдз колльөдас. Урокьяс чөжыс сәні, школа йөр дорас, куйлас-рөмидзтас, виччысяс Васьөөс да бөрсө колльөдө. Та понда, кор Васьө вөлі ёртъясыскөд спорө волас, сійөс нимтывлісны: «Ыж Вась» да «Баля Вась». Первойсө дөзмывліс, но сэсся велаліс да дугдіс. Сөмын воча шулывлас вөлі:

— Тиян абу да завид. Сійөн и эльтчаннуд...

Васьөлысь мөвпъяссө торкис мамыслөн гөлөсыс:

— Бара нин люкасьны велөдан?! Көдөскө люкыштас, да коксө чегасны.

— Велөдтөг тай кужө тайө!

Мамыс локтө, киас сумкаа: магазинө, буракө, ветлөма. А мөдарсянь, ыбъясланьянь, локтөны жө батыыс Педөр дядькөд. Педөр дядь казаяліс Осьтукөс:

— Тайө нө, еджыд плешыс, век на ловья?

— Но, тадзи, Фёдор Осипович, кывтөм пемөс йывсьыс он жө шу. Вомдзалан,— вомалыштис сійөс Васьөлөн мамыс.

— Да ме ог сылы лёксө көсйы,— джөмдывліс Педөр дядь,— сөмын думайта вөлі, мися, кулө көнкө да.

— Мыйла?— артмис мамыслөн. Васьө да батыыс чуймөмөн жө видзөдісны Педөр дядь вылө.

— Тулыснас су потшөс потшигөн,— чигарка пестігмозыс шуаліс Педөр дядь,— пинджакөс мыр вылө пукті, жар лои да. Прасла-мөд-коймөд дзоньті да куритчыны дум босьтіс. Муні мыр дорад и аддза: тайө еджыд плешыс пинджакөс кыскөма да табак көшельөс зепсьыс и сөйөма. Гөтыр со выльөс вурис,—

лэптыштліс кӧшельсӧ.— Ньӧр чеги да ырыштчи сы вылӧ, вӧт-ла, мися, ылӧджык. А сійӧ оз вӧлӧм и мӧвпав мунӧм йылысь. Казялі: синъясыс сувтсаӧсь, скӧрӧсь. Бӧрпом, табаксыс ли мый ли тыдалӧ, дзик дурмис да кызд тай зырӧдас. Ме и шемӧсми да бергӧдчи пышйыны. Но эг удит, кок кусыньӧ зяткӧб-тіс, быттӧ нӧшкӧн вартісны. Ме виччысьны кужтӧгыд и тюв-гыси да нюжалі, сувтны ог лысьт: тайӧ неылын кыйӧдчӧ да. Ме куйла, сійӧ неылын сулалӧ: ӧта-мӧд вылӧ дзоргам да вич-чысям, коді мый кутас вӧчны. Минут вит, эз кӧ дас, сідзи коли, сӧсся вешйис жӧ неылӧ да йирсыны босытчис. А ме чеччи да аслам серамӧй петӧ. Пинджакӧс век жӧ вылӧджык пуӧ ӧшӧді, мед дзикӧдз оз сӧй. И ачыс жаль лои: табактӧ, мися, сӧйис да пропадитас-и. Весиг ӧнӧдз та йылысь некодлы на эг висытав-лы. Куліг чайта вӧлі да, гашкӧ, смертсыс менӧ мыждан-ныд да.

— А-а,— кокныда ышловзис мамыс.— Талы, гашкӧ, дугдывтӧг шпуткысьлы моз, табакыс медчӧскыдтор да: йӧрӧ кӧ тай пырас — табак корйыс медматын-а. Мукӧддырйиыс дзик жӧ куритчысь моз курксӧ-кызӧ. Абу, дерт, кӧнкӧ, табакиды бур и талы. Вильшасьӧмысла сэтчӧ и велалі.

— Сідзкӧ тай ме кодъ жӧ нин,— нюммуніс Педӧр дядь да вӧрзьӧдчис гортланьыс.— Эн кӧ кув, вай олышт на,— ӧв-тыштіс кинас ыжлань.

Мамыс тшӧктіс Васьӧӧс йӧртны Ӧсытуксӧ картаас.

Сӧмын на Васьӧ удитіс пырны керкаас да пуксыны пызан дорӧ ӧновтӧм йӧв кринча дорӧ: кылӧ, посводзӧдыс, а сӧсся и кильчӧ вывтӧыс сяркнитіс-гӧнитіс Ӧсытук.

— Бара, мокасьтыд, дзоля посводз ӧдзӧссӧ игнавны ву-нӧма,— гыжйыштіс баябӧжсӧ пӧльыс.— Пета да игнала нин.

— Васюк, котӧртлы да ньӧрйышт ли мый ли Ӧсытуктӧ,— ӧшинь дорсянныс нин шуаліс мамыс.— Абу нин тайӧ пӧт кӧ-а! Ӧдзӧсӧд пегігас Васьӧӧс суӧдіс батыслӧн гӧлӧсыс:

— Эн жӧ бара дӧбельки вачкы! Мед оз жӧ доймы!





КОЛЯОЗЛА

Васьо́лысь ба́тьсö ы́стисны командировкаö карö, да төрыт лэччытöдзыс гортсеясыслы шуис:

— Э́стысь, ыб боксыс, пес вöртö тай кодкөлун пöрöдлi — ветлöй да номйöссытöдзыс вундалыштöй. Менам, колöкö, вель дыр ветлöм лоас да.

А талун асыв бригадир мамсö буретш сэтчаньö анькытш сора зöр кодзны ы́стис, да мамыс мунигас корис Васьоöс öбöд кад кежлö:

— Во́лы, пилатö öд кыскалыштан.

Пö́лысь öшинь улас ассыс табак градъяссö зырийöн гöрöма-бертлöдлöма:

— Но́лтö, Василей, мусö вештышталам. Тöвбыднад юрыд му́дзис-сьöктаммис школаад, ме́д шойччыштас-ыркалыштас. Кияснад уджышт, крепамман.

Первой град местасыс мусö бокö вешталісны, сэсся кар-

тасьыс тачкиён куйёд петкөдісны вель унаысь. Пöльыс вöлі юалас:

— Водзöдыс али бөрöдыс босьтан тачкисö?

Тачкилён водз воропьясыс дженьыдджыкөсь, сәті кутöмөн петкөднысö сьöкыдджык, но Васьö збоя вочавидзас:

— Водзöдыс, дерт.

Пöльыс сәки гусьöник нюмъөвтö да виланас кыкысь кымын и пуктас куйөдсö тачкиас. Васьö буркнитігмоз шуыштас:

— У, тайö этша да.

Пöльыс копыртчö тачкилань, медым Васьö оз казав сылысь наян нюмсö:

— Менам кок сөнöй вöснялöма да орö сьöкыдсьыс.

Васьö сөгласитчö нуны, көть и казялö пöльыслысь мудеритөмсö: мөд ногөн кө, пуктан унатö да, колөкө, и збыль кытікө пöрысьыдлөн орö, а сәсся кызди йитан.

Куйөдсö разөдөм бөрүн пöльыс ыстіс Васьöөс мамыс дөрö, а ачыс градьяссö вöчны коли. Но Васьöлы стрöка сюри да котöртіс Толейясö.

Рая заводитöма мыськавны посводз джоджсö. Толей уджаліс жö: керка саяс пыркөдіс джодж дöраяс. Васьö кутчысис джодж дöра мөдар помас да пыр и кутіс нуөдчыны: өтнаслы көдзанінö мунны вöлі гажтөм.

— Тэ сәсся мый кутан вöчны?

— Ог төд,— тракйысиг костас шуаліс Толей.— Нинөм на тай эз тшөктыны-а.

— Вай ветлам Виль му дөрö коляоз сёйны. А?

— Коляозйыд матысьджык на сюрас.

Васьö жугыльмыштіс:

— Тöда эськө да. Сәні, колөкө, гырысьджык.

— Вермас жö сідз лоны.

— Вай ветлам. Но?

Бөрпом Толей көсйысис. Найö шнөпкисны пыркөдөм джодж дöраяссö Толейяс кильчö вылө да сэтшöма, мый Рая весиг ветьöкнас ырыштчывліс, и котöртісны. Рая эськө горөдліс жö, кытчö пö мунанныд, да кинаныс макнитісны сöмын. Сёрнитчисны, мый оз висьтавны, коляозсö пö мездор тыр ваям да аддзас тон. Рад на лоö. Потшөс вомөн вуджигөн Васьö син водзö чужлі тайö серпасыс: найö Толейкөд мездор тыр коляозья ув пуктöны кильчö вылө Рая кок дөрö, а Рая паськыда

да гажаа нюммунö налы мича синлыска сьодов синъяснас да шензяна горөдөмөн копытчө коляозла...

Котөртисны найö пашкыр увйöсь гырысь пожөмаинтi, сад кодь местатi, öта-мөднысö киссьөм пожөм кольнас шуткаысь моз шыблалiгтырйи, лэчисны бокшаö ключ дорö. Васьö пондылис содзнас васö гумовтны, но Толей öлөдiс:

— Китö пö сөстөм ключ ваас оз позь суйны, ключыс пежасяс да пышьяс. Чибльöг со эм.

Юыштисны пиняд вачкысь кöдзыд да югыд васö, чибльöг-сьыс öта-мөдныслы резыштны на эз вунөдны ни, да мөдөдчисны водзö ыб горуvti потшöс пöлөныс.

Шуйгавыланыс куйлис неважөн на гөрөм му: трактор плугөн путкылялөм сөй пластьясыс абу на ёна удитөмаөсь косьмынысö. Мунан кö сэтi — кокыд нöш кодь лөö: няйтыс кöмад сы мында сибдас. Сэни ыли муса гөстьяс тыдалöны: сьод ракаяс, скворечьяс, сырчикьяс то шпоркнитласны сынөдас, быдөн ас ногныс горөдласны да бара кокасьöны. Дерт, нидзувьяс либö мукөдпөлөс му гагьясö öктöны, а, колөкө, и көдзöма нин да саявтөм көйдысö. А веськыдвыланыс туй боксяныс заводитчө вөр, кызвыныс коз, кыз да бадь пуяс. Коз пуясас коляозйыс быттьö уна сюрс öгыртор ыпьялө — сы мында петöма, кумачөн öйöны. Но вылын, он судз. Паличөн шыбланы усö чегөм могысь — дыр жö тырмас.

Подулыс васөд. Пырыштан кö пыдөджык вөрас, аддзан сэтысь неыджыд шор. Васьö Толейкөд кольөм во арланыс сэтысь турун пиысь вель уна еджыд ягсер вотлисны. Ягсерьясыс сэтшөм мичаөсь, абу гырысьöсь, ставыс пять копеек кодьöсь, быттьö кодкө нарошнө мерайтөмөн быдтөма. Солалисны да сэтшөм чөскыда артмөма — муртса кывтö он ньылышт.

Сэсся петисны косджыкинö, эрд вылө. Йöз висьталөм серти кö, важөн сэни вөвлөма кирпич вөчанiн да öнөдз на местасö шуöны кирпич сарай дорөн, көть эськө эжсялөм сөй гуяс кынди нинөм нин оз төдчы. Но тайö местаыс Толейлы да Васьöлы зэв ёна кажитчө: ыли вөрö ветлөм бөрын воан татчөдз, пуксян веськыда луд вылас, лолыштан чөскыд сынөдсö морөстырнад и кажитчө, мый мудзлуныд быттьö абу и вөвлөма, көть чеччы да котөрт сэсся гортөдзыд, и свет вылас тайö местасыс лөсьыдджыкыс сэсся абу. Гөжөмнас сэтысь оз тусьяс сюравлөны, арланыс кö — масленикьяс петöны.

Васьö да Толей воисны сэтчö да сералігтырйи некымынысь турисюв бергöдчисны. Муыс лöсьыд, косьмыштöма, луд вылас выль турун нин мыччыслöма. Сэсся тупыльтчисны на бокногөн-и.

Туйыс вуджöдіс найöс керъясысь вöчöм сярған пос вывті шор вомөн. Сувтовкерисны, видзöдыштисны ваас, öтилаысь аддзисны: шорыс няйтнас помсьöма. Лэччисны сэтчö да беддён восьтисны сылы туйсö. Шорыс быттьökö ловзис, гажмис, дзольгыны-сьывны пондіс. Бедьяс вылас рöдтіг-ордйöдчиг мөдöдчисны водзö и, кор воисны мамысьяс кöдзанінö, тракторыс уджалысьяслөн буретш сувтіс: öбöд пö. Толейöс да Васьöс Васьöлөн мамыс йöлөн юктöдыштіс (аскöдыс босьтлöма) да пыртіс пес вөр дорас. Пуяссö батыс, вöлөмкö, пөрлөдлöма вевсьөн öта-мöд вылас. А колязойыс мыйта! Шензьымөн. Васьö Толейкöд видлісны да — дзик на быттьö свежöй, абу на заводитлöма рушмыштны. Найö пыр жö и самасисны сэтчö, но мамыс Васьöлөн торкис:

— Мужикъяс, ноко волöй татчö, видлöй ёнөсь-ö нин.

Сійö босьтöма кык воропа пила да нюмъялö.

Пила пырысь-пыр жö заводитіс нязгыны-сьывны ассьыс сьыланкывсö то гораджыка, то лөнъджыка. Первойсö мамыскöд пилитчис Васьö, Толей верзьёмөн пу вылас пукаліс, лөгөмсьыс кутіс, но регыд кутіс дольны:

— Вай ме пилитышта, вай ме сэсся!

Васьö вежсис ськөд местанас. Недыр мысти бөр вежсисны. Пуяссö вундалісны, нель чурка-кузя кражъяс вылö — гортаныс нуны сідзсö лöсьыдджык: позьö и вöла доддын, позьö и машина кузовын.

Ыб вылын, кылö, эркнитіс трактор, да мамыс кутіс тэрмасьны:

— Гашкö, тайöс ті сэсся эштöданныд да?

Васьö да Толей öтсöгласысь гогнитісны юрнаныс.

— Сідзкö тайö урок пыдди тіянлы. Эштас да, пила-черсö эсійö муöдзыс сук увъя понöль улас кольöй бöрыннас дай.

Нель-ö-вит пу колö на вöлі вундавны, да кык друг сюся босьтчисны уджö. Регыд жö и пöсялісны, и пилаыслөн öдыс чиніс. Öти дін вундигөн пиласö топöдіс. Толей нетшыштіс асланыс да гатш уси, пуксис нитш вылö:

— Лолöдыс тай топöдіс!

Васьö асланыс кыскыштис пиласö, но сийö сибдöма ёна, воропыс мынис кысыс да гатш жö шнёпкысис, кокъясыс вывлань быдсөн качлісны, серöктіс. Толей сералö жö. Теш. Теш ли абу ли — уджсö помавны колö: сатшкисны черсö пила туйö да кокняммис.

Вель на дыр ковмис налы ноксыны: шойччигмозныс коляоз на сёйыштисны и, Раялы нуны вель уна ув керыштисны медмича да медгырысь тусьясасö.

Пиласö да черсö понöль улö пуктігөн нин Васьöлы син вылас веськалі зэв мичаник коз пу. Бурджыка видзöдліс да — коляозйыс быттьö синсö сэтчö домаліс. Шуö Толейлы:

— Вай этійö пусö пöрöдам. Со коляозйыс чунь пом кодь ставыс.

Толейлы, буракö, абу нин окота:

— Миян абу жö посныд ни руш, нöб тыр нин.

— Пöрöдам,— асныралö Васьö да мунö пулань. Öтчид, мöдысь сатшкö, а черыс матö мөрччö да быд сатшкигөн выль местаö. Дöзмискодь да выныштчис, ёнджыка сатшкис, но чагйыс чуктіс кызкö, черыс вольскис... шуйга кокас, пидзöс горулас! Васьö здук кежлö кынмывліс места вылас, юрси йылöдзыс кодзыд гы муніс, сэсся лои жар. Видзöдліс бурджыка кок вылас (а видзöдлынысö страк!): черыслөн бöжыс быттьö сибдöма сэтчö. Кыскан кö, көнкö, вирыс шорөн ыльöбтас. А оз тай нö быттьö весиг доймы. Толейлань лэптис синъяссö — Толей шемöс жö сулалö.

Другыс кö орччөн эз вöв, Васьö, колöкö, важөн нин «бы, бы, бы» синва сорөн лэдзис, öні оз жö кут бöрдны.

Васьö надзöникөн кыскис чер бöжсö ранасыс да öдйö видліс гач коксö: керыштчöма абу. Дöраыс нейджыда розьясьыштöма. Сідзкö, абу пыдöдз! Шаркнитис-пуджис гач коксö и аддзис: кок кузяыс тюрöбөн тюрис вирыс. Бара усьлі сьöлöмыс.

Толей пыр жö матыстчис.

— Мыйкö колö ляскыны, мед вирыс оз пет. Ставыс кö петас — кулан,— сийö корсысыс зепсыс.— Весиг дöратор абу. Танö со руба эм, мамö нянь босьтны сетліс. Ляскы. А-а, час ме небыд сямöд кульышта да гартыштам, тэ краж вылас пуксы, — казяліс Васьöлысь быгалём чужöмсö да шуис сийö.

Васьö и збыль бледöдліс «став вирыс кö петас — кулан»

кывъяссыд, но краж вылө пуксис. Қызкө-мыйкө өтувийөн сюмөдөн гартисны коксө, Толей разис коссыс тасмасө да көрталіс, мед оз усь сюмөдыс. Чер босьтис да понөль керыштис нитш увтыс, мед вужйыс сюрас, увйис — артмис крука бөдь:

— Вот, отсөг вылө.

— Оз өд доймы,— лөня шуыштис Васьө. Сувтис, воськовтис пөв-мөдыс — быттө оз и доймы. Копыртчис коляозъя увъясла. А Толей шуө:

— Чөв, вай мунам өдийөджык, энөвт тайөс.

— Көсйысьлім да.

— Мый нө көть. Ми өд асьным аслыным шулім.

Васьө бара асныраліс:

— Босьтам...

— Шыбит, меся!

Мукөддырйи кө эськө, колөкө, тышөдз волісны, но өни Толей видзөдліс Васьө чужөм вылө да пельпомсө лэптыштліг-моз шуыштис:

— Босьт, колөкө,— ачыс лэптис жө мусыс кымынкө ув.

— Тэ бара, гортө воам да, некодлы эн висьтав,— корис Васьө.

Толей водз чуньсө пинь бердас топөдліс: то пө, немөй, другөс оз жө вузав.

Бөрсө шор вомөн вуджигөн Васьөлы кажитчис, мый сылөн өдыс чинөма, дзольгөмыс лөнныштөма, ваыс пемдыштөма, жугыльмөма. Толейыс кутис кольны. Толей муныштас водзө, бергөдчас да виччысьө:

— Ёна доймө?

Васьө тэрмасьөмөн вочавидзө:

— Оз, оз!— аслыс эськө ывла вылыс син водзас пемдыштөма нин, и туйыс гортланьө нуө, а нюжалөма, оз көсйы помасьны. Кор Толей водзын лөсялас, видлө чанькйөмөн вөтчыны, но сідзисө абу жө бур — чеччыштөмсьыс кокас тувкө да доймө жө. Сэтшөм окота пуксьыны муас да пукалыштны, но Васьө мурч курчөма пиньяссө: «Пуксян кө, колөкө, бөрсө чеччыны он вермы?» Муно водзө, бөдь вылас лэдзчысялөмөн.

— Шыбитам коляозсө да меө кутчыс,— бара шуө Толей.

— Оз өд доймы. Мунам,— а кывъясыс петалөны сьөкыда, быттө өдва путкыльтчасны вомсьыс. Шыбитасны кө — кутшөм налы дон. Көть Рая и оз төд көсйысьлөмнысө, но бө-

рыннас кызди сійө синъясө видзөдлан? И Васьө бара восьла-лө шойччалігтырйи, юрсиыс ва нин пөсьысла, киясыс тіра-лөны...

Вөлөсьтананс воигөн сійө нөшта на зумаммөдіс асьсө — мед озджык төдчы доймөмыс, киас бедьсө быттьө дуриг моз кутө. А кор Толейяс кильчө вылө шнөпкисны коляозья ув чукөрсө да Рая петіс керкасыс, зырөдіс ув чукөрланьыс, квати-тіс сійөс моздорас, весиг өд чутйөдлөмсьыс ни сирөссьөмысь эз повзы, радысла места вылас чеччыштліс, а мичаник синъя-ясас нимкодьыс оз төр, сідзи и коясьө, сідзи и коясьө — Ва-сьөлөн доймөм кок йывсьыс быдөн вунлі.

Горт дінас нин сөмын палялі, кор пөльыс тшөктіс табак рөсадас киськавны: сійө лунтырнад градьястө вөчөма, зыр-йөн бөрөзда бокьясө шлопөдөма — любө видзөдлыны, табак рөсадасө ящикысь босьталө да муас дасьтөм гөпьясө сюялө. «Бара эссея гожөмбыд тайө табакнас ковмас ноксьыны», — Васьө жугыльпырысь босьтіс ведра да чотігтырйи вайис стру-ба дорысь ва, пондіс киськавны. Кызкө-мыйкө эськө эштө-діс, пуксис кильчө помө, бедьсө орччөн пуктіс.

Мамыс локтөма нин да лысьтысьөм бөрын пөгребө вөлөм йөв петкөдө да крукасис беддяс, эз жө тай усь-а, увгыны пон-діс:

— Быдпөлөс лөпсө гортө ваян, этша нин татшөм бед-дьыд туплясьө! Беддя старик моз өдва лайкьялан! Мун ветлы да ичиньтө пывсьыны кор.

Васьө повзыштліс: вөлөмкө, пөльыс нөшта и пывсян на ломтывлөма. Вот сәні и явитчас! Мый жө вөчны? Ичиньсө корны мунігөн керка саяс пуджыштліс гач коксө да видзөд-ліс: вирыс оз нин пет, сямөд көртөдыд кутөма, но важыс кок кузяыс визувтөма да сэтчө косьмөма, дульнас вель өна ниртіс.

Мый жө вөчны? Висиг кө шусян — шызясны, помтөм юасьөм лөө. Мый жө вөчны?

Пывсянө лэччан кад воис, пөльыс босьтіс корөсь да лэч-чис, а Васьөлы абу окота. Мамыс казяліс нюжмасьөмсө:

— Тэ нө мый сэтшөм ньөжмыда?

— Меным абу на окота да... — нюжөдыштіс Васьө нырсө көрлігмоз.

— Дыр нин лои пывсьөмыдлы, мун лэччы.

— Ме Толейясын неважөн на пывси, — пөрийштіс Васьө.

— Мед, мед. Вай лэччы өдйөджык. Дөрөм-гачтө вежны колө: няйтысла регыд кучик кодь лоө, потласяс.

Жугыльпырысь, но лои лэччыны. Пөльыс вылыс джоджас корөсьөн нин швачкөдчис. Тайө, өти ногөн кө, бур: ру пырыс көртөдтө, гашкө, оз казяв. Пырис да бокногөн моз и мунис таз-лань. А пөльыс корө:

— Василей, вай өти көш содтышт, озджык төдчы.

Васьө гумовтис пөртсыс васө да койыштит горйө. А гор вывсынь руыс быттьө йөткыштит кисө, көшыс тшөтш пөся-лис — көдзыд ва ведраө кинас и ставнас лои суюны. «Акк!»— артмис Васьөлөн.

— Сотін мөй?— пөльыс лөньлис швачөдчөмсыс, видзө-дө Васьөланыө.— Кокад нө мый сэтшөмыс?

Сотөмсыд Васьөлөн бергөдчыссьөма да коктө тыдөд-сьөма. Вот и казялис. Ещө өд шусьө омөля аддзиг, газет лыд-дигөн пыр өчкиасыө. Аддзө на тай!

Васьө чөв олө, а пөльыс бара:

— Эн кыв: кокад тай, юала, мый сэтшөмыс?

Васьө мөдарө бергөдчөма, тэрмасьөмөн таз босьтит, кись-тыштит сэтчө ведраысь ва, көшнас клөнөдчө, а доймөм коксө дзебны зильө мөд кок саяс. Но пөльыс пондис лэччыны нин вы-лыс джоджсыс.

— Че-р са-атши-ис!— быттьө бөрддзис Васьө.

— Чер? Но мокасьтө! Мыйкө өд лөнчиктан вөлі да кысь... Беддя и. Вай видлам... Час, огөй, пежасяс ещө...— сэсся стрөг-джыка:— Дуралей, нитщ юр, татшөмтор лоөма да сідз-тадз олан?

— Видчанныд ө-өд?— лывөстис Васьө, көртөдсө кинас видлалиг.

— Эн разь, эн. Час...— пөльыс восьтит пывсян өдзөссө да кутис горзыны:

— Лида-а! Лида-а! Сусед ордад ветлы. Гортас кө, мед мота... мота... тьпу! мотацилкнас больничаө Васьөтө нуvas. Қоксө, мор детинаыд, буракө, дойдөма.

Кильчө вылас ведра ли мый ли, кылө, грымгысис: мамыс-лөн, дерт, повзьөмйывсыс. Васьө сідзи и төдис, мый мамыс-лөн садьыс бырө, кор төдмалас. А пөльыс броштит:

— Ноко, пасьтась, эн көтөд. Мокасьтө детина! Йөй на тай тэ дзик вөлөмыд, вежөртөм! Мыйкө нө кө торксис да кок-

төмман? Атто, мокасты!..— гөлөсыс сэсса небзыштис.— Мөд ногөн кө, абу лябсысыс да, бур жө да. Салдат пу быдман. Вай өдийджык, өдийджык...

Қор больничанын Васьюос водтөдісны кроватьө, кокас укольяс зургисны, суюмөд көртөд пыдди төбисны лым еджыд бинтөн да пуктісны коксө юрлөс вылө, а мамыс да сестраяс петісны, сылы дум вылас усылі Терень дядь, коді воддза во тані жө куйліс. Сійө война вылын ранитчывлөма. Васью өні раненной жө. Дерт, война вылад, көнкө, өнджыка доймө... Сэсса син водзас воис Раялөн нимкодяссысыс чужөмыс да ачыс нюммуніс и вомгорулас кутіс шуавны сыылігмос:

— А коляозсө ва-айим, а коляозсө ва-айим...

Қоксысыс дойыс ылыстчыштис, да Васью сідзи лөвтігмос и унмовсис.





КИРПИЧ ВӨЧЫСЬЯС

Август төлысса мөд джынйыс вөлі вывті нин гудыр да зэра: то асывсяныыс заводитас кысьтны, то рытланыыс, а өткымын луньясас и лунтыр войтасьө. Сиктсаяс шуасьны нин кутісны: арся зіляыс пө босьтөма, буракө, ставсө көтөдас-ойдөдас да весиг мый му вылас быдмис, идравнысө бур ногөн оз сет. А Васьөлөн пөлыыс надейтчис на:

— Прамөй гожөмыс зэра вөлі да оз өмөй баба гожөмыс бурджык ло? Шулывлөмаөсь: зэра гожөм бөрын пө мича ар пуксьывлө. Пелысь серти кө, розйыс таво этша да, арыслы бурөн тай нө колө лоны-а?

И збыльысь, сентябрь төлысьыс воис да, кодкө быттьө ыджыд гөликөн кытчөкө рытиввывланыыс чышкыштис став зэра кымөрсө, шондіыс быд лун кутіс нюмъявны.

Васьөлөн пөлыыс, поведятө төдіс да, стрөка кө сюрө, быдөнлы та йылысь висьталө, аслыс гажа, градьяс вылысь

ассьыс табаксö кералö да лöскö öшлö, мед сэнi воймас кось-
тытöдзыс, а сэсся и гортгөгöрса му вылысь этшаникаöн карту-
пель идралö.

Васьö Толейкöд, Раякöд да мукöд зонпосникöд гырысь-
яслы совхоз картофель му вылын отсасисны быд лун, ведра-
ясөн да пу вужйысь кыöm дозьясөн картофель идралан маши-
на бöрся вöтлысисны да öктысисны, зiлисны öта-мöднысö
панйыны, кодi унджык доз öктас-тыртас. Но пыр мыйлакö
вöли Раялөн медуна лöö. Гашкö, сы вöсна, мый Васьö да Толей
тшöкыдджыка бипур дорö сувтлöны вöли, лöп пес сэтчö сод-
тасны, либö печенча пöжавны биас пуктасны, либö кыскалö-
ны биысь пöжассьöмсö нин. Быд рыт локтасны вöли гортаныс
печенча сёйöмсьыд са чужöмаöсь, мудзыштöмаöсь, но долы-
дöсь.

Картопельыд регыд идравсис, мукöд уджъяс вылас йöзыс
совхозын эз нин сэтшöм уна ков, да школаын пондiсны велöд-
ны быд лун. А кадыс вотчан на вöли, да унаöн ветласны вөрö
и локтöны сэтысь мыш саяныс гырысь кузовьясөн: тшак да
пув ваялöны. Школа бöрын кö гортсаясыс град йөрö оз вöли
индыны, Васьö да Толей пырысь-пыр жö вөрö котöртласны да
пемдытöдзыс вель уна косьтан да солалан тшак на ваясны.

Но öти рытö Васьöясö пырис Буткан Степан, да чужис
выль пöлöс удж.

Буткан Степан олö вöли сикт мöдар помас, керкаыс сы-
лөн сувтöма дзик ю кыр йылас, мукöдсьыс бокöджык да быт-
тьö сэсся думыштчöма, мыйла пö ме бара тадзисö вöчи. Кер-
каса кöзяиныс пыр жö мыйкö йылысь думыштчöма. Гожöмын
кö, кöзырсö картузыслысь, а тöлын кö — шапкаыслысь син-
мöдзыс лэдзöма, улыс вом дорас пыр öшалö чигарка пом,
быттьö сэтчö пыр кежлö сибдöма. Ветлöдлö, посныдика
восьлалö, кирзövöй сапöгнас няйтсö лойö либö буссö куртö —
гожöмын ли арын кö, а тöлын кö — гынкöм новлö. Мунö да му-
кöд дырйиыс Васьöлөн пöлыс шулас, адзö оз пö бара ачыс
туйсö, мед эськö эз жö крукась, усяс öд! Кодкö кö кутшöмкö
удж сиктын панлiс: либö выль керка пуктыны, либö важ öшинь
куричьяс вежны, либö выль кильчö вöчны, либö выльпöрйö
керка вевттыны, либö жö юкмöс кодйыны — сэтчö Буткан
Степан медводз вöли локтас. Корсюрö мыйысь-нибудь видыш-
тас, корсюрö кутшöмкö колана индöд сетас, отсыштас мыйöнкö

неуна и бөрпомыс, кызд Васьолөн пöльыс жö висьталö вöлі, быть корас недыр кежлö мыйкö вöчасян кöлуй пиысь. Сэсся кадыс кольö и кольö, а корöмторйыс Буткан Степан ордö пыр кежлö и овмöдчö. Татшöм ногөн Буткан Степанлөн чукөрмис став пöлöс вöчасян кöлуйыс, мый ковлывлö сиктса морт овмöсын, да мукöд дырийыс кöлуйыслөн вöвлöм кöзяиныслы аслыс нин лоö вöлі корны, сылысь удждывны мыйкö. Буткан Степан кутіс лыддыны асьсö быдтор вöчны кужысьөн, код отсöгтöг сиктын уна удж водзö оз вөрззы. Корасны кö вöлі кытчöкö, «ассьыс» вöчасян кöлуйсö босьтас, мунö корöминас да надзöникөн ныр пырыс аслыс сёрнитö: «бут, бут, бут». Таясь син саяс йöзыс Буткан прöзвищöсö и сетöмаöсь.

Вот öти рытö тайö Буткан Степаныс пырис Васьöясö да и шуö Васьö бать-мамлы мыкталана кодь сёрнинас:

— Ре-гыд ар помыс та-ля-лас ми-янöс. Кир-пичнад мый ку-там вöч-ны? Öжи-гайт-ны жö эсь-кö колі, ма-кар тош да.

— Тöдöмысь эськö колі да, век тай некор,— воча шуыштіс Васьöлөн батыс.

— Тайö кирпич вöсна сарайын некөн бергöдчыны лои. Тöv кежлö турун весиг некытчö вайны. Öжигайтöма кö эськö вöлі да пач тэчöмыс таво эз ло, кирпичсö гöбöчö меститны позис,— сёрниö пырис мамыс.

Пöльыс нинöм эз шу. Сійö буретш вöлі табаклысь заяссö вундалö, пуртыс ныжмыштöма да кеслö сійöс зудйөн.

— Уна-ö нö эськö кирпичныд? Сё кöкъямыс ловас?

— Да, сы гөгөр кымын,— тöдчöдіс батыс.

— Менам сизим сё да почтальон Марьялөн пö сё эм да тшöтш корö öтсор öжигайтны. Қык пач кö öжигайтанінас вöчам и. Тошкаыд öд тöдö, кызди колö, кöнкö,— Буткан Степан нюмъялігтыр довкнитіс Васьö пöльлань.

— Пöльыслы, тыдалö, Буткан Степан эз вöv сьöлöм сертиыс, син бöжнас öдйöкодь кыйкнитліс гөсьтлань, а сы шөрö мöдыс нöшта «тошкаөн» шуис, да веськодя моз:

— Прамöй кужысь йöзлысь тöдмавны коліс. Ме тайö уджад омöль отсасьысь.

Буткан Степан öзтіс куслöм чигаркасö, нёнялыштіс, чигарка помыс бара öшйис льöбьяс, шуалис:

— Пожöгын пö та кузя Миколай Васильич бур да тöдысь мастерөн вöлöма. Тшöктö, вöлöм, со кызд вöчнысö: первой

пачьяс моз тэчны кирпичьяссö, эжаöн вевттыны да куим сутки ломтыны, но мед эз жармы. Пескыс пö мед чусалигмоз сотчис, сэки кирпичыс пö косьмö, сэссия пö жармöдыштны да сутки сідзи ломтыны, бöрыннас бара бисö лöньöдны. Дерт, бурджык ассьыс юавны ветлыны колö, шувам, макар тош, вöлі да, кувсьыны вот удитöма,— ас вöдзас видзöдиг да думайтигмоз сёрнитис Буткан Степан.

Мöд луныс вöлі субöта да, кор Васьö локтіс школаысь, пыр и аддзис: керкасянныс неылын, бокшаас, кодйисьöмаöсь, а кодйöм весьтас Буткан Степан да батыс кокьяс йылö вевт лöсьöдöны, дерт, зэрмас кö, сы шöрö-водзö. Сэссия сэтчö тарантаса вöлön кирпичьяссö ваялісны. Васьö вöвнас веськöдліс, гортсьыс ваяліс, Буткан Степан ордысь, Марья тьötка дорö кежавліс и. Батыс да Буткан Степан кодйöминас öти-мöдсянныс маті костön бок ногön кирпичьяссö пондісны тэчны да ломтанінсö лöсьöдны. Буткан Степан ыджыд пыдди, мастер пыдди, батысö Васьöлысь велöдö:

— Эн тшöкыда тэч! Эн! Костсö коляв! Пузясны ставыс öтлаö — торйöдны ог вермöй!

Васьö ассьыс вöчöмторьяссö вайис жö, гортса пемöсьясöс сёйысь вöчліс да, сетіс батыслы, мед тшötш кытчöкö пуктас. Батыс найöс ломтанінас матö и пуктіс.

Рытланьыс пачьясыд эштисны, да эжаöн найöс вевттисны, кытсюрö костьяс колисны, медым тшыныс петас. Войланьыс уль пескön пачьяссö ломтісны да би видзöм йылысь сёрнитчисны. Медводздаöн кöсьысис Буткан Степан. А мöд луннас Васьöяслы ковмис. Буретш вöлі вöскресенньö, и бать-мамыс Васьöös ыстисны.

Буткан Степан тшöктöм серти пачьяссö бара лöдсалисны уль пескön да важ потшöсьясысь перьялём роймём да сисьмём потшьясön да майöгьясön. Таысь вевт улын вöлі зэв тшына. Васьö аддзис пес пövстысь неыджыд чурка пом да пуксис улöджык, медым тшыныс омöльджыка сёйис синьяссö, öт-тшötш сідзисö бурджыка тыдаліс и пач пытшкöсыс. А пескыс пачьясас сотчис дыша, би кывьясыс быттьö чöскыдтöмпырысь нюлісны налы сетём сёянсö. Васьö видзöдліс сэтчань, кытчö батыс пуктывліс сылысь вöчöмторьяссö. Найö вöлі гөрдöдöмаöсь да жмитчöмаöсь öта-мöд бердас: вöлыс юрсö кыпöдöма, быттьö кöсьö дзескыд пельöсысь звиркнитны кирпич во-

мõныс да некыдзи оз вермы, и Васьõлы друг быттьõ кылїс сылõн полїгтырїи гõрдлõмыс. Ыж да пон быттьõ ворсны лõсьõдчõмаõсь, воча сулалõны.

Васьõлы дум вылас уси тулысья кирпич вõчан уджыс. Пõльыс да мамыс тарантаса вõлõн жõ ящикьясын ю дорысь мича лыа ваялїсны да вõвлõм кирпич сарайдорса кушынысь гõрд сей. Батысь кирпич вõчан баласõ стружитїс-мольõдїс, лõсьõдїс, а Васьõ гачсõ лядвейõдзыс пуджõмõн ыджыд ящикын лыасõ да сейсõ ваõн киськалõмõн мудзтõдзыс лойис. Сэсся босьтас батысь кыкнан кинас тайõ рудовгõрд роксõ да мый-вынсьыс кыдзи тай шнëпкас колодка-балаас, кияснас личкалыштас, мед став кушыныс тырõ, лишнõй роксõ пуысь вõчõм пуртõн бала сертиыс нирснитас-вундас да и шуõ Васьõлы:

— Ноко, босьтлы воропьясõдыс, перьям!

Босьтасны, неуна пыркнитыштасны батыськõд, и колодка-баласьыс лыа вылõ кольõ быттьõ оз кирпич, а нянь тупõсь. Мелїа босьтасны сїйõс да дорыш ногыс пõв вылõ пуктасны, медым мукõдсьыс костõн лои и ногыс эз торксьы и косьмис бурджыка.

Некымын лун мысти найõ сы мында кирпич вõчисны!

Костьясас сэки Васьõ сейсьыс и вõчалїс пемõсьяссõ да пуктїс пõв вылõ кирпичьясыскõд орччõн. Пõльыс аддзис, полїгтырїи чуткис чуьнас, сэсся босьтїс сейысь вõчõм ыжсõ, гõгõрпõв видлалїс, юрсõ боквыв кусыньтõмõн Васьõ вылõ видзõдлїс:

— Осьтуктõ õмõй думайтõмыд вõчигад? Сэтшõм кодь тай, мокасьтыд, артмõма-а. Тэ, гашкõ, и гырничьяс вõчны велõдчан? Онї õд тай гырничтõ он и аддзы, колõкõ, кыдзи колõ вõчнысõ, вунõдїсны. А гырничад видзõм йõлыд аслыс кõра, здоровье сетõ. Гырничыд, майбыр, абу тэд стеклõ банкаыд либõ пласмасыд.

— Тэнад биыд шонтысьны али мый мунõма?!— вевт ув дорын сулалõ Толей, кias ведраа.— Батыд татысь висьталїс да, вот, думайта, бур. Ведра джын картофель вайи, печенча пõжалам, ме и сов тшõтш босьтї. Толькõ мый нõ тэ! Пестõ видзан? Содты, мед гажаджыка сотчис!

Васьõ шулїс, оз пõ позь, но Толей эз кывзысь, содтїс пессõ. Биыс пыр жõ гажмис. Кисьтїсны пач вомгьясõ найõ картофельсõ да тырталїсны õгырьясõн да пõимõн.

Пемдігас локтіс Васьолөн пöльыс, видзöдліс пачьясö:

— У-у, стөрöжъяс жö! Биыслөн лолыс петны кутöма. Ноко, кусмонавтъяс, эстөн сарай бокас сирöд песьяс вöліны, ветлöй вайöй.

Ветлісны кымыныськö пєсла, а бөръя вайигас аддзöны: пöльыс абу нин öтнас, орччөн Буткан Степан пукалö. Пöльыс шыбитіс сирöд пєссö пачьясас, а Буткан Степан увгыны кутіс:

— Тэ нö мый! Оз позы! Режим серти колö вöчны! Тшыкö-дам!— Босьтіс коколюка да песьяссö бөр кыскаліс, бисö на-ысь вачкаліс-кусöдіс.

Пöльыслы, Васьö видзöдö да, тайö эз кажитчы:

— «Режим»! «Режим»! Кирпичьяссыд бөр му лоö, да сэк казялам! Мыйысь сэк пачсö тэчам, тэнад «режимысь» али мый?

— Миколай Васильич ачыс тадз шулöма вöчны...

— «Миколай Васильич»! Вась Миколайыд шуткатöг оз вöлі весиг воськовт. Кос пу йылысь туриöс вермö аддзыны, сідз висьталас, мый эскан. А тэ «режим» йылысь большан. Аслыд чувствуйтны колö...

Буткан Степан кыв шутöг синъяснас лапйöдлö, нёнялö ку-сöм чигарка помсö. Думайтö, ышнясьö, сэсся шуö:

— Мастерьясыдлысь велöдöмтö быттö кывзыны жö колö да... Гашкö, пєссö содтыштам ли?

— Дерт жö!— гажмö Васьолөн пöльыс да пырысь-пыр пöv-мöд пєскөн лöдсалö пачьяссö. Пєскыс кос, сирöд, пыр жö найö вошöны би вомö, биыс горшмис, нюлö нин пач сводсö, кывсö нюжйöдлö эжа пластьяс костöд вывлань сьöд тшын сорыс.

Буткан Степанлөн чужöм вылас полöм:

— Мед нин тайö тадз, а водзö лöньджыка колö! Вывті ыджыд биыс, макар тош! Тшыкöдам...

— Нинöмтор!— пöльыс нöшта на кутчысьö пєскö, но Буткан Степан кутö сійöс киöдыс.

— Энлы, макар тош!.. Ме со мыйла эськö волі да: гöты-рöй висьмис да вой кежö ас местаö тані овны кора.

— Тайötö позьö, мыйла нö оз, нелючки кö суис,— шуö пöльыс.

— Сöмын эн зэв жарит. Тіян кирпичныд косджык, да не сідз на, а миян да Марьялөн улькодь на.

Польыс вочавидзё:

— Сідзкё, ме тиян пачё öти пес кута дзумгыны, а асланы-мё кыкёс. Бур?— гөлөсыс гажа, ачыс збодермёма, синьясыс югьялёны, ышмёма.

— Ме тадз кё нин. Эн жё вывтi тшöкыда,— ышловзиг-моз шуö Буткан Степан да мунö. Сылы, тыдалö, тайö на уна кажитчö.

Польыс пуксьö Васьö да Толей костö, киас босьтö печенча, юасьö:

— Öти кыв мен узыны эз кут сетны, роч да, гашкö, ог гö-гөрво да? Тi öд рочтö велöданныд, гашкö, мокасьтъяс отсаланныд? «Öжигайтöм».

— Сотны мыйкö сідзкö, комиён кö, либö жö абу дзикöдз сотны, а биын видзны, ме думысь,— висьталö Толей.

— Менам сідз жö гөгөрвосьö. А кыз нö омöль бинас, тшыннас али мый кирпичыс öжигайтчас?!— ыдждö пöльыслөн гөлөсыс.— А Степан шуö: эн пö жарит... Йöзыс эськö сэк эз «öжигайтöм» шуны, а «косьтöм» либö нöшта на мöд ног. Степан вот шуö: тшыкöдам пö. А кыз колö вöчны, мед оз тшык, сійö ни ми ог тöдöй, мокасьтыд.

Недыр кад лöня пукалö, печенча сёйö, чышкö тошсö, бара юасьö челядьлысь:

— Йöзкостса кывлы эскам, али Степан навукалы? А?— Васьö да Толей виччысьöмөн жö видзöдöны сы вылö.— А, йöз ногыс видлам!— да шыблалö песьяссö пачö, а мöд пачас шыбитигөн сувтовкерлö, этшаджык сэтчö лöдö, дум вылас воис Буткан Степанлөн корöмыс.

Ышмöм биыс некымын метра ылнаö вöтлö пемыдсö, врсöдчö югөръяснас найö чужöмъяс вылын, тшöктö бöрынтьчыштны — жар лои.

— Аски школааныд безöбедаö колясны. Мунöй, гортса уджнытö, дерт на, эн исыштлöй,— шуö пöльыс.

Би дорын лöсьыд, пöльыс оз-оз да и кутшöмкö интереснöтöр олёмсьыс казтыштас-висьталас, мунны дыш на, но некутшöм помка кольччыны оз отсав.

— Мунöй, аски на луныс воас,— чорзьöдö пöльыс гөлөс-сö, да лöч челядьлы чеччыны.

Би дорад пукалигөн вевт увсянныд эз и казьявлыны, кутшöм мича енэжыс лöма: войвывланыс кодзувьясыс абуось,

а енэжтыс уна сикас рёма сувтса визьяс мунёны: лөзьяс и югыд турунвижъяс, и гөрдъяс — быдсямаыс, өшкамөшка сер кодьюсь и, быттьо кузь да паськыд лентаяс некутшөм шпоркөдчан шытөг төв песө, муланьыс нюжавласны визьясыс, быр-лөны, сэсся бара эмөсь. Видзөдан-видзөдан и пыр на окота, а сьөлөм выланьыс и полөм воө. Гожөмын гымалігөн чардышт-лас-югдыштлас да сэсся йиркакылө, а тані лөнь, ставыс шытөг вөрөшитчө. Васью да Толей сулалісны-сулалісны да кыв шутөг и пызйыштісны гортөдзныс.

Асывнас пөльыслөн сьөлөмыс бурмөма, висьталө:

— Сирөд пес эськө коліс нөшта корсьлыны да. Этшаджык тайө лоө. Оні Марья, сө кирпича бабаыд, локтіс да и-структуриуйті, кыз колө вөчны Степан серти да ме серти. Луннас ковмас на видзөдлыны.

Рытнас бара Васью, Толей да пөльыс би видзисны. Зонка-яс вель унаысь петавлісны вевт улысь енэжсө видзөдлыны, сэзь жө вөлі да, но тайө рытнас вой кыаыс эз вөв. Пөльыс шуис, тайө пө шондісянь овлывлө, сідзи пө учёнойяс газетө гижөны, а талун, сідзкө, шондіыс мудзөма, сійөн и абу.

Вой кежлас найөс вежны локтіс Буткан Степан: гөты-рыслы кокныдджык лоөма. Чужөм вывсьыс вежсис, кор пачьясад видзөдліс, но нинөм эз шу.

Мөд луннас Васью локтіс школаысь да кыліс, кызди пө-льыс батыслы норасис:

— Степан бара бисө чинтөма, мокасьгыд. Шуө: помлань пө вайөдны колө. Ме думысь, водз на. Асылөдзыс эськө пра-мөя на дубитны колі. Вот муна да ломта, а сійө кыз кужас сэсся мед!

Толей да Васью өбөд бөрын капуста му вылө көчангьяссө чукөртны ветлісны да рытнас муртса пачьяс дорө пес нуышт-ны и кежавлісны, клубө война йылысь зэв интереснөй кино вайөмаөсь да. А аскинас школа бөрын найөс бара на ыстыв-лісны капуста му вылө. Гортаныс локтісны сөмын пемдігас нин.

Котөртісны өжигайтчанінө, а пачьяссө сәні заводитөма-өсь нин разөдны. Бисө, тыдалө, луннас на кусөдлөмаөсь, са-өсь эжасө гөгөр шыблалөмаөсь. Кысьсюрө кирпичьяссө пер-йөмаөсь. Васью матыстчис, лажыньтчывліс, босьтіс асьыс

сэйысь вöчөмторъяссö, найö пöсьöсь на вöліны, да пуктіс не-
ылö.

Буткан Степан да Васьöлөн батыс пукалісны муас пук-
тöм потшьяс вылын бокинджык. На дорын ва ведра, а сэтчö
суйöмаöсь кык кирпич. Муас, ведра дорас, кирпич торъяс
куйлöны.

Недыр мысти сэтчö жö пöльыс локтіс:

— Мый нö эсперментыд висьталö?— а аслас чужöмас му-
дерлун.

— Да со... мыйлакö, макар тошкыд, кирпичыс ва бось-
тö,— жугыля шуö Буткан Степан.

Пöльыс мышку сайсьыс петкөдлö кирпич:

— А этійö со ватö и оз босьт. Ме эстысь, миянладорсьыс
босьті, сводсьыс перйи. Вот тэд и Миколай Васильич. Ме öд
шулі, мый сійö вöлі ю вомөн вуджас да коксö оз кötөд. А йöз-
кост кывйыс веськыда висьталö, сöмын ми унаысь гөгөрвонь-
сö ог кужöй, думыштнысö дышöдчам ли.

— Кутшöм кыв нö сэтшöмыс?— чуймö Буткан Степан,
чигарка помыс öшйö увлань.

— Кутшöм! Ми тані öтарсянь и мöдарсянь бергөдлім
волшебной кыв корсигмоз. «Ожигайтчöм» да, «сотчöм» да,
«чусалöм» да — ставсö видлалім, коді мый значитö.

Буткан Степан кыскö ведрасьыс кирпичьяссö, пу помөн
муртса кучкыштö наö. Кирпичьяс дрöбмунöны. Сійö пукалö
потшьяс вылын, юрыс нöшта на улöджык лэччö, синьяссö
дзикöдз картуз кöзырыс тупкис, чигарка помыс кок дорас уси.
Шуалö лөнника, жугыля:

— Асланым нö мед тшыки кö нин, а кызди Марьялы та
йылысь висьталан? Сылысь уджсö, макар тошкыд, тшötш
пасьварті...

Васьö видзöдö ичötмöм Буткан Степан вылö и сылы жаль
мортыс. Васьö син водзын муніс став уджныс, мыйта кад нок-
сисны тайö кирпичьяснас, да и Буткан Степанлөн семьяыс
мыйта пöсь кисьтіс, Марья тьötка тшötш и, да вöлисти гөгөр-
воö, мый сöмын пöльыслөн аслысног вöчöмыс дорйис тшыкö-
мысь налысь уджсö.

Сулалöны найö Толейкөд да гырысьяс вылö видзөдöны.
Буткан Степан шы ни төв. Батыс сідз жö. Пöльыс баялбöж-

тыс картузсö кыпöдыштö да сэтi гыжъялö, шуö сьöлöм сетiг-
моз:

— Мыйся öд оз овлы, Степан Öльöксандрович. Пач тру-
баад öд шогмасны, дзикöдз оз пызйыссы да. Сидзкö, ставыс
эз на вош.

Тайö кывъясыс быттьö мездöны измöминысь. Быдөн вö-
рöшитчыны пондiсны, чеччисны места вывсьыныс. Пачьяссö
шуисны мöд луннас косявны.

Гортас Васьö ассыс вöчöмторъяссö ва пиö жö суйлис, а
кор кыкис, аддзис быттьökö выль синъясөн: найö ваад суй-
лöм бöрын югъялыштiсны, печиктыштан наö да тринькнитыш-
тöм кылö. А вöлыс лöма дзик прамöй вöv кодь.

Кирпичьяссö быдөн гортаныс новлисны, да регыд Буткан
Степанлөн да Марья тьötка почтальонлөн керка выланис
гöрд кирпичысь кыптiсны трубаяс, кодъясöс крепыд вылö вö-
ли гартöма сутугаөн, а Васьöяс керкаын, мöд жыръяс, тэчис-
ны плитаа пач. Тэчигас, дерт, Буткан Степан волiс жö ин-
дöдъяс сетны.

Но тайö кадсянныс, кор Васьö вöли аддзас Буткан Степа-
нös, пыр сылы син водзас волiс Буткан Степанлөн кирпич ты-
ра ведра дорын пукалiгдырся жугыль чужöмыс. И сэксянь Ва-
сьöлы Буткан Степаныс пыр лолi жаль и кызкö сьöлöм вы-
лас эз вöвлы лöсьыд сы вöсна, мый гырысьяс, олöм вуджöм
йöз, кодъясöс сиктын тöдöны, кызди бур удж вöчны кужысь-
ясöс, вермöны жö, вөлöм, сорсьыны и налөн оз жö быдтор арт-
мы кöсйöм серти. И татшöм здукъясас Васьöлы медся ёна
окота вöвлi, медым эськö быдтор артмис и пöльыслөн, и ма-
мыслөн да батыслөн, и Буткан Степанлөн да Педöр дядьлөн,
и став сиктса олысьяслөн.

Нöшта Васьö мövпалiс, мый вот найö Толейкöд да Рая-
кöд быдмасны ыджыда, верстьöодз, да став уджсö кутасны
вöчны бура сёрнитчöмөн, ставсö тöдмалöмөн, öтсöгласөн. Ме-
дым быдтор артмис топыда да бура, да медым некод на вылö
некор эз видзöдлы жалитана синъясөн Буткан Степан вылö
моз.



Для детей младшего школьного возраста

ИБ 582

Михаил Иванович Игнатов

ВАСЯ И КАРДИНАЛ

Рассказы

На коми языке

Рецензент **Н. Н. Куратова**. Редактор **Т. Н. Чукичева**. Художник **М. П. Безносков**. Художественный редактор **А. В. Мошев**. Технический редактор **А. Н. Вишнева**. Корректор **А. А. Надуткина**.

Сдано в набор 10.11.81. Подписано к печати 16.02.82. Формат 70×90^{1/16}. Бумага № 1. Гарнитура литературная. Печать высокая. Усл. печ. л. 4,09; усл. кр.-отт. 4,67; уч.-изд. л. 2,94. Тираж 4500 экз. Заказ № 6600. Цена 10 коп. Коми книжное издательство. 167610. Сыктывкар, ул. Каркса, 229. Республиканская типография Государственного комитета Коми АССР по делам издательств, полиграфии и книжной торговли. 167610. Сыктывкар, ул. Коммунистическая, 20а.

10 кӧп.

КОМИ КНИЖНОЙ ИЗДАТЕЛЬСТВО 1982